

M. MINVCII
FELICIS
OCTAVIVS.



OXONIÆ,
Excudebat GVILIELMVS TVRNER,
Impensis THOMÆ HVGGINS,
M. DC. XXXL

M. MINVOLI

FEHICIS

OCTAVIUS



OXONIAE

GUILLIELMUS TANNER
THOMAS HENNING

MDCCXXI



TYPOGRAPHVS
LECTORI.

NEc tuo compendio
(candide Lector)
nec scriptoris hu-
jus dignitati satis caue-
runt, qui limpidissimam
puræ latinitatis scate-
bram cum * turbido Ar-
nobio confundebant. Non
ero tamen venerando Pa-
tris nomini ita iniurius,

* Arnob.
inæqualis
& nimius,
& absque
operis sui
partitione
confusus.
Hieron. ep.
13. ad Paul.

ut dicam eos tam impari
nexu (cum Mezentio a-
Ænied. 8. apud * Virgilium) vi-
ventem cadaveri copulas-
se. Sed sanè tam infœlix
consortium maximas huic
libro tenebras offudit:
qui verè audit expiran-
tis jam Romæ eloquen-
tiæ vltimus conatus, &
quasi mox emorituræ lu-
cernæ supremus fulgor.
Hunc à mendis quæ in e-
ditione Frobenianâ sub-
inde occurrunt repurgan-
dum.

dam curavi. Scholia in
scriptorem tam omnium
manibus tritum superva-
canea duxi: cum tyrones
veteranorum operâ in e-
volvendo hoc authore ut-
plurimum utantur. Ha-
bes hîc igitur purum pu-
tum Minucium, id est
geminam nativo meli-
us splendore mi-
cantem: frueri,
& Vale.

Lactantius Divinarum
Institutionum.
Lib. V. c. I.

Minucius Felix, non
ignobilis inter causidicos
loci fuit. Huius liber, cui
Octavio titulus est, decla-
rat, quàm idoneus veri-
tatis assertor esse potuis-
set; si se totum ad id stu-
dium contulisset.



M. MINVCII
FELICIS
OCTAVIVS.



Ogitanti mi-
hi, & cum ani-
mo meo *Octa-*
vij boni, & fi-
delissimi con-
tubernalis me-
moriā recensenti, tanta dul-
cedo, & affectio hominis inhæ-
sit, vt ipse quodammodo mihi
viderer in præterita redire, non
ea, quæ jam transacta, & decur-

2 *M. Minucij Felicis.*

sa sunt, recordatione revocare. Ita eius contemplatio, quantum subtracta est oculis, tantum pectore meo, ac penè intimis sensibus implicata est. Nec immeritò discedens vir eximius, & sanctus, immensum fui desiderium nobis reliquit: vtpote cùm & ipse tanto nostri semper amorè flagraverit, ut & in ludicris, & serijs pari mecum voluntate concineret: eadem vellet, vel nollet, crederes vnam mentem in duobus fuisse divisam. Sic solus in amoribus conscius ipse, socius in erroribus: & cum discussâ caligine de tenebrarum profundo in lucem sapientiæ, & veritatis emergerem, non respuit comitem; sed, quod est gloriosius, præcucurrit. Itaque cum per
vni.

vniversam convictus nostri, &
 familiaritatis ætatem mea co-
 gitatio voveretur, in illo præ-
 cipue sermone ejus, mentis
 meæ resedit intentio, quo *Cæ-*
cilium superstitiosis vanitati-
 bus etiam tum inhærentem,
 disputatione gravissimâ ad ve-
 ram Religionem reformavit.
 Nam negocij, & visendi mei
 gratiâ *Romam* contenderat,
 relictâ domo, conjuge, liberis;
 & quod est in liberis amabili-
 us, annis adhuc innocentibus,
 & adhuc dimidiata verba ten-
 tantibus, loquelâ, ipso offensan-
 tis linguæ fragmine, dulciore.
 Quo in adventu ejus non pos-
 sum exprimere sermonibus,
 quanto, quâque impatienti
 gaudio exultaverim, cum au-
 geret maximè lætitiâ meam
 ami-

4 M. Minucij Felicis

amicissimi hominis inopinata
præsentia. Igitur post vnum,
& alterum diem, cum jam &
aviditatem desiderij frequens
assiduitatis vsus implêsset; &
quæ per absentiam mutuam de
nobis nesciebamus, relatione
alternâ comperissemus; pla-
cuit *Hostiam* petere amcenissi-
mam civitatem, quod esset cor-
pori meo siccandis humoribus
de marinis lavacris blanda, &
apposita curatio. Sanè & ad
vindemiam feriæ judiciariam
curam relaxaverant. Nam id
temporis post æstivam diem,
in temperiem semet autumni-
tas dirigebat. Itaque cum di-
luculo ad mare inambulando
litori pergeremus, vt & aura
aspirans leniter membra vege-
taret, & cum eximiâ voluptate
molli

molli vestigio cedens arena
subsideret: *Cecilus* simulacro
Serapidis denotato (vt vul-
gus superstitiosus solet) ma-
num ori admovens, osculum
labijs impressit. Tunc *Octa-
vius* ait: Non boni viri est,
Marce frater, hominem domi
forisque lateri tuo inhaerentem,
sic in hac imperitiæ vulgaris
cæcitate deserere: vt tam lu-
culento die in lapides eum pa-
tiaris impingere, effigiatos sa-
nè, & vinctos, & coronatos:
eum scias huius erroris non
minorem ad te, quàm ad ip-
sum infamiam redundare.
Cum hoc sermone ejus medi-
um spacium civitatis emensi,
jam liberum litus tenebamus.
Ibi arenas extimas, velut ster-
neret ambulacro, perfundens
lenis

6 *M. Minucij Felicis.*

lenis vnda tundeat : & ut
semper mare etiam positis fla-
tibus inquietum est, etsi non
canis spumosisque fluctibus
exibat ad terram, tamen crispis
torosisque. Ibidem errori-
bus delectati perquam sumus,
cum in ipso æquoris limine
plantas tingueremus, quod vi-
cissim nunc adpulsum nostris
pedibus alluderet fluctus;
nunc relabens, ac vestigia re-
trahens, in sese resorberet.
Sensim itaque tranquillèque
progressi, oram curvi molliter
litoris, iter fabulis fallentibus,
legebamus. Hæ fabulæ erant
Octavij differentis de naviga-
tione narratio. Sed ubi eundi
spacium satis justum cum ser-
mone consumpsimus, eandem
emeni viam rursus versis ve-
stigijs

stigijs terebamus. Et cum ad id
loci ventum est, vbi subductæ
naviculæ substratis roboribus,
à terrenâ labe suspensæ quiesce-
bant: pueros videmus certatim
gestientes, testarum in mare ja-
culationibus ludere. Is lusus
est, testam teretem jactatione
fluctuum levigatam legere de
litore: eam testam plano situ
digitis comprehensam, incli-
nem ipsum atque humilem,
quantum potest super vndas
inrotare: vt illud jâculum, vel
dorsum maris raderet, vel ena-
taret, dum leni impetu labitur:
vel summis fluctibus tonsis e-
micaret, dum assiduo saltu
sublevatur. Is, se in pueris
victorem ferebat, cujus testa
& procurreret longiùs, & fre-
quentiùs exsiliret. Igitur cum
omnes

8 M. Minucij Felicis.

omnes hac spectacula voluptate caperemur, *Cacilius* nihil intendere, neque de contentione ridere: sed tacens anxius segregatus, dolore, nescio quid vultu fatebatur. Cui ego, Quid hoc est rei? Cur non agnosco *Cacili* alacritatem tuam? Cur illam oculorum etiam in ferijs hilaritatem requiro? Tum ille; Iamdudum me *Octavij* nostri acriter angit & remordet oratio, quâ in te in-
vectus, objurgavit negligentia; ut me dissimulanter gravius argueret inscientia. Itaque progrediar ulterius: de toto & integro mihi cum *Octavio* res est. Si placet, ut ipsius sectæ homo cum eo disputem, jam profectò intelliget facilius esse in contubernalibus disputare,

putare, quàm conferere sapientiam : modò in istis ad tutelam balnearum jactis, & in altum procurentibus petrarum obicibus residamus, vt & requiescere de itinere possimus, & intentiùs disputare. Et cum dicto ejus affedimus, ita, vt me ex tribus medium lateris ambitione protegerent. Nec hoc obsequij fuit, aut ordinis, aut honoris; quippe cum amicitia pares semper aut accipiat aut faciat: sed vt arbiter, & vtrisque proximus aures darem, & discrepantes duos medius segregarem.

Tum sic *Cacilius* exorsus est: Quanquam tibi, *Marce* frater, de quo cum maximè quærimus, non sit ambiguum;

10 *M. Minucij Felicis.*

um; vtpote qui diligenter in
vtroque vivendi genere versa-
tus repudiâris alterum, alte-
rum comprobâris: inpræsen-
tiarum tamen ita tibi infor-
mandus est animus, vt libram
teneas æquissimi iudicis, nec
in alteram partem propensus
incumbas: ne non tam ex no-
stris disputationibus nata sen-
tentia, quàm ex tuis sensibus
prolata videatur. Proinde si
mihi quasi novus aliquis, &
quasi ignarus partis vtriusque
confidas; nullum negotium est
patetâcere, omnia in rebus hu-
manis dubia, incerta, suspensa,
magisque verisimilia, quàm
vera. Quò minùs mirum est,
nonnullos tædio investigandæ
penitus veritatis cuilibet opi-
nioni temerè potiùs succum-
bere,

bere; quàm in explorando pertinaci diligentia perseverare. Itaque indignandum omnibus, imò indolescendum est, audere quosdam, & hos studiorum rudes, literarum profanos, expertes artium, nisi sordidarum; certum aliquid de summa rerum ac maiestate decernere; de qua tot [omnibus] seculis sectarum plurimarum usque adhuc ipsa Philosophia deliberat. Nec immerito: cum tantum absit ab exploratione divina humana mediocritas, ut neque quæ supra nos caelo suspensa sublata sunt, neque quæ infra terram profunda demersa sunt; aut scire sit datum aut scrutari permisum, aut sciscitari religiosum. Et beati satis, satisque prudentes jure

12 *M. Minucij Felicis*

jure videamur, si secundum illud vetus Sapientis oraculum; nosmetipsos familiarius noverimus. Sed quatenus indulgentes insano, atque inepto labori, ultra humilitatis nostrae terminos evagamur, & interram projecti coelum ipsum, & ipsa sidera audaci cupiditate transcendimus, vel hunc errorem saltem non vanis & formidolosis opinionibus implicemus. Sint [principiò] omnium femina naturâ in se coeunte densata: quis hic auctor Deus? Sint fortuitis concursionibus totius mundi membra coalita, digesta, formata: quis Deus machinator? Sidera licet ignis accenderit, & coelum licet materia sua suspenderit: licet terram fundave-

daverit pondere, & mare licet
influxerit è liquore : vnde hæc
religio, vnde formido, quæ su-
perstitio est ? Homo & ani-
mal omne quod nascitur, inspi-
ratur, & alitur, elementorum
voluntaria concretio est : in
quæ rursus homo, & animal
omne dividitur, solvitur, dissi-
patur. Ita in fontem refluunt,
& in semet omnia revolvun-
tur, nullo artifice, nec judi-
ce, nec auctore. Sic con-
gregatis ignium seminibus so-
les alios atque alios semper
splendere : sic exhalatis terræ
vaporibus, nèbulas semper a-
dolescere ; quibus densatis co-
actisque, nubes altiùs surgere ;
ijsdem labentibus, pluvias flu-
ere, flare ventos, grandines in-
crepare : vel nimbis colliden-
ribus

14 *M. Minucij Felicis.*

tibus tonitrua mugire, rutilare fulgura, fulmina præmicare. Adeo passim cadunt, montes irruunt, arboribus incurrunt, sine delectu tangunt loca sacra & profana, homines noxios feriunt, sæpè & religiosos. Quid tempestates loquar varias, & incertas; quibus nullo ordine, vel examine, rerum omnium impetus volutatur? In naufragijs bonorum malorumque fata mixta, merita confusa; in incendijs interitum convenire insontium, nocentiumq; & cum tabe pestiferâ coeli tractus inficitur, sine discrimine omnes deperire: & cum belli ardore sævitur, meliores potius occumbere. In pace etiam non tantum æquatur nequitia melioribus, sed & colitur: ut in plu-

pluribus nescias, utrum sit eorum detestanda pravitas, an optanda felicitas. Quod si mundus divinâ providentiâ, & alicujus numinis auctoritate regeretur; nunquam mereretur *Phalaris*, & *Dionysius* regnum, nunquam *Rutilus* & *Camillus* exilium, nunquam *Socrates* venenum. Ecce arbusta frugifera, ecce jam seges cana, jam temulenta vindemia imbrī corrumpitur, grandine cæditur: adeo incerta nobis veritas occultatur, & premittitur; aut (quod magis credendum est,) varijs, & lubricis casibus, soluta legibus fortuna dominatur. Cùm igitur aut fortuna certa, aut incerta natura sit, quanto venerabilius, ac melius, antistitem veritatis majorum

16 M. Minucij Felicis

rum excidere disciplinam ; religiones traditas colere ; deos, quos à parentibus ante imbutus es timere, quàm nosse familiarius ; adorare : nec de numinibus ferre sententiam, sed prioribus credere ; qui adhuc rudi seculo in ipsius mundi natalibus meruerunt Deos vel faciles habere, vel reges. Inde adeò per vniversa imperia, provincias, oppida, videmus singulos sacrorum ritus gentiles habere, & Deos colere municipales ; vt *Elusinius, Cererem ; Phrygas, Magnam matrem ; Epidaurios, Æsculapium ; Chaldaeos, Belum ; Astarten, Syros ; Dianam, Taurorum ; Gallos, Mercurium ;* vniversa Romanos. Sic eorum potestas, & auctoritas totius orbis ambitus occupavit : sic impe-

imperium suum ultra solis vi-
as, & ipsius Oceani limites
propagavit; dum exercent in
armis virtutem religiosam;
dum urbem muniunt sacrorum
religionibus, castis virginibus,
multis honoribus ac nomini-
bus sacerdotum: dum obsessi,
& citra solum Capitolium cap-
ti, colunt deos, quos alius jam
sprevisset iratus, & per *Gallo-
rum* acies mirantium supersti-
tionis audaciam, pergunt telis
inermes, sed cultu religionis
armati: dum captis hostilibus
incenibus, adhuc ferociente vi-
ctoriâ numina victa veneran-
tur: dum undique hospites De-
os quærunt, & suos faciunt:
dam aras extruunt etiam igno-
tis Numinibus & Manibus. Sic
dum univrsarum gentium sa-

18 *M. Minucij Felicis*

cra fusciunt, etiam regnare
meruerunt. Hic perpetuus
venerationis tenor mansit, qui
longâ ætate non infringitur, sed
augetur. Quippe antiquitas cæ-
remonijs, atque fanis tantum
sanctitatis tribuere consuevit,
quantum adstruxerit vetusta-
tis. Nec tamen temerè (au-
sim enim interim & ipse con-
cedere, & sic melius errare) ma-
jores nostri, aut observandis
augurijs, aut extis consulendis,
aut instituendis sacris, aut de-
lubris dedicandis operam na-
vaverunt. Specta de libris me-
moriæ: jam eos deprehendes
initiâsse ritus omnium religio-
num, vel ut remuneraretur divi-
na indulgentia, vel ut avertere-
tur imminens ira, aut ut jam
tumens & sæviens placaretur.

Testis

Testis *mater deum*, quæ adven-
tu suo & probavit matronæ ca-
stitatem, & urbem metu hostili
liberavit. Testes equestrium
fratrum in lacu, sicut ostende-
rant statuæ consecratæ; qui an-
heli spumantibus equis atque
fumantibus, de *Perse* victoriam,
eâdem die, quâ vicerant, nun-
ciaverunt. Testis ludorum of-
fenso *Iove* de somnio plebei
hominis iteratio: & *Decio-
rum* devotio rata testis est: te-
stis & *Curtius*, qui equitis sui
vel mole, vel onere hiatum
profundæ voraginis coæqua-
vit. Frequentius etiam quàm
volebamus deorum præsentia
contempta auspicia conte-
stata sunt. Sic *Allia*, nomen in-
faustum; sic *Claudii* & *Iunii*,
non prælium in *Pænos*, sed
B 2 fera-

20 *M. Minucij Felicis*

ferale naufragium est. Et ut
Thrasimenus Romanorum san-
 guine & major esset, & deco-
 lor, spreuit auguria *Flaminius*:
 & ut *Parthos* signa repetamus,
 dirarum imprecationes *Cras-*
sus & irrisit & meruit. Omitto
 vetera quæ multa sunt, & de
 deorum natalibus, donis, mu-
 neribus: negligo carmina poë-
 tarum; prædicta etiam de ora-
 culis fata transilio, ne vobis an-
 tiquitas nimium fabulosa vi-
 deatur. Intende templis ac de-
 lubris deorum, quibus Romana
 civitas & protegitur & orna-
 tur: magis sunt augusta numi-
 nibus incolis, præsentibus, In-
 quilinis; quàm cultu insignia,
 & muneribus opulenta. Inde
 adeò pleni, & mixti Deo vates
 futura præcerpunt, dant caute-
 lam

lam periculis, morbis medelam,
spem afflictis, opem miseris, so-
latium calamitatibus, laboribus
levamentum : etiam per quie-
tem deos videmus, audimus, ag-
noscimus; quos impiè per diem
negamus, violamus, pejeramus.
Itaque cum omnium gentium
de dijs immortalibus, quamvis
incerta sit vel ratio, vel origo,
maneant tamen firma consensio;
neminem fero tantâ audaciâ,
tamque irreligiôsâ nescio quâ
prudentiâ tumescentem, qui
hanc religionem tam vetu-
stam, tam vtilem, tam salubrem
dissolvere, aut infirmare nita-
tur. Sit licet ille *Theodorus*
Cyrenæus, vel qui prior *Dia-*
goras Melius, cui *Atheon* cog-
nomen apposuit antiquitas;
qui vterque nullos deos asse-

22 *M. Minucij Felicis*

verando, timorem omnem,
quo humanitas regitur, vene-
rationemque penitus sustule-
runt: nunquam tamen in hâc
impietatis disciplinâ simulatâ
Philosophiâ nomine, atque au-
thoritate pollebunt. Cum *Ab-*
deritem Protogoram Atheni-
enses viri, inconsultè potius
quàm profanè de divinitate
disputantem, & expulerint suis
finibus, & in concione, ejus
scripta deusserint: quid homi-
nes (sustinebitis enim me im-
petum susceptę actionis liberi-
us exerentē) homines (inquam)
deploratâ, illicitâ, ac despera-
tâ factionis grassari in deos,
non ingemiscendum est? Qui
de ultimâ fâce collectis impe-
ritioribus, & mulieribus cre-
dulis, sexus sui facilitate laben-
tibus,

tibus, plebem profanæ conjurationis instituunt : quæ nocturnis congregationibus, & jejniis solemnibus, & inhumanis cibis, non sacro quodam, sed piaculo foederantur : latebrosa, & lucifuga natio, in publico muta, in angulis garrula : templa, vt busta, despiciunt : deos despuunt, rident sacra, miserantur miseri (si fas est) sacerdotum honores, & purpuras despiciunt ipsi seminudi : pro mirâ stultitiâ, & incredibili audacia spernunt tormenta præsentia, dum incerta metuunt & futura : & dum mori post mortem timent, interim mori non timent. Ita illis pavor, & falax spes solatio redivivo blanditur. Ac jam, vt foecundiùs nequiora proveniunt,

24 *M. Minucij Felicis*

unt, serpentibus indies perditis moribus per vniversum orbem sacraria ista teterima impiæ coitionis adulescunt. Erubenda prorsus hæc & execranda consensio. Occultis se notis & insignibus noscunt, & amant mutuò penè antequàm noverint: passim etiam inter eos velut quædam libidinum religio miscetur, ac se promiscuè appellant Fratres & sorores, ut etiam non insolens stuprum intercessione sacri nominis fiat incestum. Ita eorum vana, & demens superstitio sceleribus gloriatur. Nec de ipsis, nisi subsisteret veritas, maximè nefaria & honore præfanda sagax fama loqueretur. Audeo eos turpissimæ pecudis caput asini consecratum ineptâ nescio quâ per-

persuasione venerari: digna, &
nata religio talibus moribus,
Alij eos ferunt ipsius antistitis
ac sacerdotis colere genitalia;
& quasi parentis sui adorare
naturam. Nescio an falsa, certè
occultis ac nocturnis sacris ap-
posita suspicio: & qui homi-
nem summo supplicio pro fa-
cinore punitum, & crucis lig-
na feralia, eorum caeremonias
fabulantur, congruentia perdi-
tis, sceleratisque tribuunt alta-
ria, vt id colant quod meren- / pag: 97.
tur. Iam de initiandis tirun-
culis fabula tam detestanda
quàm nota est. Infans farre con-
tectus, vt decipiat incautos,
apponitur ei, qui sacris imbui-
tur. Is infans à tirunculo far-
ris superficie, quasi ad innoxio-
s ictus provocato, cœcis, oc-
cul-

26. *M. Minucij Felicis*

cultisque vulneribus occiditur: hujus (prò nefas) sitienter sanguinem lambunt; hujus certatim membra dispertunt: hâc foederantur hostiâ; hâc conscientiâ sceleris ad silentium mutuum pignorantur. Hæc sacra sacrilegijs omnibus terreriora. Et de convivio notum est, passim omnes loquuntur; id etiam Cirtensis nostri testatur oratio: Ad epulas solenni die coeunt, cum omnibus liberis, sororibus, matribus, sexus omnis homines, & omnis ætatis. Illic post multas epulas, ubi convivium caluit, & incestæ libidinis fervor ebrietate exarsit, canis qui candelabro nexus est, jactu offulæ ultra spacium lineæ, quâ vinctus est, ad impetum & saltum provocatur.

catur. Sic everſo, & extincto
conſcio lumine, impudentibus
tenebris nexus infandæ cupidi-
tatis involvunt, per incertum
fortis; & ſic non omnes operâ,
conſcientiâ tamen pariter in-
ceſti; quoniam voto vniver-
ſorum appetitur, quicquid ac-
cidere potest in actu ſingulo-
rum. Multa prætereo conſultò.
Nam & hæc nimis multa ſunt,
quæ aut omnia, aut pleraque
omnium vera, declarat ipſius
pravæ religionis obſcuritas.
Cur etenim occultare & abſ-
condere, quicquid illud colunt,
magnoperè nituntur? Cum ho-
neſta ſemper publico gaudeant,
ſcelera ſecreta ſint? Cur nullas
aras habent, templa nulla, nulla
nota ſimulacra? Cur nunquam
palâm loqui, nunquam liberè
con-

vid. pag.
104.

28 M. Minucij Felicis

-pve- congregari sustinent, nisi illud
 quod colunt & interpretantur,
 aut puniendum est aut puden-
 dum? unde autem, vel quis
 ille, aut ubi Deus vnicus, soli-
 tarius, destitutus: quem non
 gens libera, non regna, non sal-
 tem *Romana* superstitio nove-
 runt? *Iudaorum* sola & mise-
 ra gentilitas, vnum & ipsi De-
 um, sed palàm, sed templis, a-
 ris, victimis, caeremoniisque
 coluerunt: cuius adeò nulla
 vis, nec potestas est, vt sit *Ro-
 manis* numinibus cum suâ sibi
 natione captivus. At etiam
 Christiani quænam monstra,
 quæ portenta confingunt? De-
 um illum suum quem nec o-
 stendere possunt nec videre, in
 omnium mores, actus omni-
 um, verba denique & occultas
 cogi-

cogitationes diligenter inquire-
rere? Discurrentem scilicet, at-
que vbiq̃ue præsentem: mole-
stum illum volunt, inque-
tum, impudenter etiam curi-
osum. Siquidem astat factis
omnibus, locis omnibus inter-
errat: cum nec singulis infer-
vire possit per vniversa distri-
ctus; nec vniversis sufficere in
singulis occupatus. Quid, quòd
toti orbi, & ipsi mundo cum si-
deribus suis minantur incen-
dium, ruinam moliuntur; quasi
aut naturæ divinis legibus con-
stitutus, æternus ordo turbe-
tur; aut rupto elementorum
omnium fœdere, & cœlesti
compage divisa; moles ista,
quâ continemur, & cingimur,
subruatur. Nec hâc furiosâ o-
pinione contenti, aniles fabulas
ad-

-trac-

30 *M. Minucij Felicis.*

adstruunt & annectunt. Renasci
se ferunt post mortem, & ci-
neres, & favillas: nescio quā
fiduciā mendacijs suis invi-
cem credunt. Putes eos jam
revixisse. Anceps malum & ge-
mina dementia, cœlo & astris
quę sic relinquimus (vt inveni-
mus) interitum denunciare; si-
bi mortuis, & extinctis (qui si-
cut nascimur, & interimus) æ-
ternitatem repromittere. Indè
videlicet & execrantur rogos,
& damnant ignium sepulturas.
Quasi non omne corpus, etsi
flammis subtrahatur, annis ta-
men & ætatibus in terram re-
solvatur: nec intersit vtrum
feræ diripiant, an maria consu-
mant; an humus contegat, an
flamma subducatur: cum cada-
veribus omnis sepultura, si sen-
tiunt,

tiunt, pœna sit; si non sentiunt,
ipsâ conficiendi celeritate, me-
dicina. Hoc errore decepti be-
atam sibi, vt bonis, & perpetem
vitam mortuis pollicentur: cæ-
teris, vt injustis, pœnam sem-
piternam. Multa ad hæc sup-
petunt, ni festinet oratio. In-
justos ipsos, magis nec laboro,
jam docui: quanquam etsi ju-
stos darem, culpam tamen vel
innocentiam fato tribui, sen-
tentijs plurimorum, etiam ve-
stra consensio est. Nam quic-
quid agimus, vt alij fato, ita }
vos Deo addicitis. Sic sectæ
vestræ non spontaneos cupere,
sed electos. Igitur iniquum
iudicem fingitis, qui sortem in //
hominibus puniat, non volun-
tatem. Vellem tamen sciscita-
ri, vtrūne sine corpore, an
cum

32 *M. Minucij Felicis*

cum corporibus? & corporibus quibus, ipsis ne, an innovatis resurgatur? sine corpore? sine corpore, quod sciam, neque mens neque anima, nec vita est. Ipso corpore? sed jam ante dilapsus est: alio corpore? ergo homo novus nascitur, non prior ille reparatur. Et tamen tanta ætas abiit, secula innumera fluxerunt; quis vnaus ullus ab inferis vel *Protesilai* sorte remeavit horarum saltem permissio comineatu; vel ut exemplo crederemus? Omnia ista figmenta male sanæ opinionis, & inepta solatia à poetis fallacibus in dulcedine carminis lusa, à vobis nimium credulis, in Deum vestrum turpiter reformata sunt. Nec saltem de præsentibus capitis experimen-

mentum, quàm vos irritæ pol-
licitationis cassa vota decipi-
ant.

Quid post mortem im-
pendeat, miseri, dum adhuc vi-
vitis, estimatis. Ecce pars ve-
strum, & major & melior, ut
dicitis; egetis, algetis, ope, re,
fame, laboratis: & Deus pati-
tur? dissimulat, non vult, aut
non potest opitulari suis. Ita
aut invalidus, aut iniquus est.

Tu qui immortalitatem postu-
mam somnias, cum querquero
quateris, cum febribus vreris,
cum dolore laceraris, non tum
conditionem tuam sentis? non
tum agnoscis fragilitatem? in-
vitus miser infirmitatis argue-
ris, nec fateris? Sed omitto com-
munia. Ecce vobis minę, suppli-
cia, tormenta, & jam non ado-
randæ, sed subeundæ cruces:

ignes

34 M. Minucij Felicis.

ignes etiam, quos & prædicitis & timetis: ubi Deus ille?

Qui subvenire reviviscentibus potest, viventibus non potest?

Nonne *Romani* sinè vestro Deo imperant, regnant, fruuntur orbe toto, vestrique dominantur? Vos verò suspensi interim atque solliciti, honestis

voluptatibus abstinetis; non

spectacula visitis, non pompis interestis: convivia publica

absque vobis; sacra certamina, præcerptos cibos, & delibatos

altaribus potus abhorretis. Sic reformidatis deos, quos negatis.

Non floribus caput nectitis; non corpus odoribus honestatis;

reservatis vnguenta funeribus; coronas etiam sepulchris

denegatis, pallidi, trepidi, misericordiâ digni, sed nostrorum

deorum.

deorum. Ita nec resurgitis mi-
feri, nec interim vivitis. Proin-
dè si quid sapientiæ vobis, aut
verecundiæ est, definite cœli
plagas, & mundi fata, & secreta
rimari. Satis est propedibus
aspicere; maximè indoctis, im-
politis, rudibus, agrestibus;
quibus non est datum intelli-
gere civilia, multò magis de-
negatum est disserere divina.
Quanquam, si philosophandi
libido est, *Socratem* sapientiæ
principem, quisquis vestrū
tantus est, si potuerit, imitetur.
Ejus viri quoties de cœlestibus
rogabatur, nota responsio est:
Quod supra nos, nihil ad nos.
Meritò ergo de oraculo testi-
monium meruit prudentiæ sin-
gularis. Quod oraculum idem
ipse præsentit, iccirco vniver-
fis.

36 *M. Minucij Felicis*

sis se esse prepositum; non quòd
 omnia comperisset, sed quod
 nihil se scire didicisset: ita
 confessę imperitię summa pru-
 dentia est. Hoc fonte deflu-
 xit *Arcesila*, & multo post *Car-
 neadis*, & *Academicorum* plu-
 rimorum in summis quęstio-
 nibus tuta dubitatio, quo gene-
 re philosophari, & cautę indo-
 cti possunt, & docti gloriose.
 Quid, *Simonidis Melici* nonne
 admiranda omnibus & sectan-
 da cunctatio? Qui cum de eo,
 quid, & quales arbitraretur de-
 os ab *Hierone* tyranno quære-
 retur, primò deliberationi di-
 em petijt: postridiē biduum
 prorogavit, mox alterum tan-
 tū admonitus adjunxit: po-
 stremò cum causas tantę morę
 tyrannus inquireret, respondit
 ille,

ille, quòd sibi, quanto inquisitione tardior pergeret, tanto veritas fieret obscurior. Meâ quoque opinione, quæ sunt dubia, ut sunt, relinquenda sunt: nec tot ac tantis viris deliberantibus, temerè & audaciter in alteram partem ferenda sententia est; ne aut anilis inducatur superstitio, aut omnis religio destruat^{ur}.

Sic *Cæcilius*, & renidens.
(nam indignationis ejus tumorem effusæ orationis impetus relaxaverat,). Et quid ad hæc (ait) audet *Octavius*, homo *Plantina Prosapia*, ut pistorum præcipuus, ita postremus philosophorum? Parce, inquam, in eum plaudere: neque enim prius exultare te dignum

38 *M. Minucij Felicis.*

dignum est concinnitate sermonis, quàm vtrinque plenius fuerit peroratum; maximè cum non laude, sed veritate disceptatio vestra nitatur. Et quamquam magnum in modum me subtili varietate tua delectârit oratio, tamen altiùs moveor, non de præsentia actione, sed de toto genere disputandi; quòd plerunque pro differentium viribus, & eloquentiæ potestate, etiam perspicuæ veritatis conditio mutetur. Id accidere pernorum est auditorum facilitate, qui dum verborum lenocinio à rerum intentionibus avocantur, sinè delectu assentiuntur dictis omnibus, nec à rectis falsa secernunt: nescientes in esse & in incredibili verum, & in versimili mendacium.

um. Itaque quò sapiùs asseve-
rationibus credunt, eò frequen-
tius à peritioribus arguuntur:
sic assiduè temeritate decepti,
culpam iudicii transferunt ad
incerti querelam, vt damnatis
omnibus malint vniversa sus-
pendere, quàm de fallacibus
iudicare. Igitur nobis provi-
dendum est, ne odio identidem
sermonum omnium labore-
mus: ita vt in execrationem &
odium hominum plerique sim-
pliciores efferantur. Nam in-
cautè creduli circumveniuntur
ab his, quos bonos putaverunt:
mox, errore consimili jam sus-
pectis omnibus, vt improbos
metuunt, etiam quos optimos
sentire potuerunt. Nos proinde
soliciti, quòd vtrinque in omni
negocio differatur, & ex altera
parte

40 *M. Minucij Felicis*

parte plerumque obscura sit
veritas, ex alterâ lateat mira
subtilitas; quæ nonnunquam v-
bertate dicendi fidem confessæ
probationis imitetur; diligen-
ter, quantum potest, singula
ponderemus; vt argutias qui-
dem laudare, ea verò quæ recta
sunt, eligere, probare, suscipere
possimus.

Decedis (inquit *Cacilius*)
officio iudicis religiosi. Nam
perinjurium est, vires te actio-
nis meæ intergressu gravissimæ
disputationis infringere, cum
Octavius integra & illibata ha-
beat singula.

Si potest refutari id quod cri-
minaris, inquam, in commune,
nisi fallor, compendium pro-
tuli,

tuli, vt examine scrupuloso
nostram sententiam non elo-
quentiæ tumore, sed rerum ip-
sarum soliditate libremus: nec
avocanda, quod quereris, diu-
tius intentio, cum toto si-
lentio liceat responsionem *Ia-
nuarij* nostri jam gestientis au-
dire.

Et *Octavius*: dicam equi-
dem, vt potero, pro viribus; &
adnitendum tibi mecum est, vt
conviciorum amarissimam la-
bem verborum veracium flu-
mine diluamus. Nec dissimu-
labo principio ita *Natalis* mei
errantem, vagam, lubricam, nu-
tasse sententiam; vt sit nobis
ambigendum, vtrum sua eru-
ditio turbata sit, an vacil-
laverit per errorem. Nam
C interim

42 *M. Minucij Felicis*

interim deos credere, interim
se diliberare variavit, ut pro-
positionis incerto, certior re-
sponsionis nostræ intentio fun-
daretur. Sed in *Natali* meo
versutiam nolo, non credo.
Procul est ab ejus simplicitate
subtilis urbanitas. Quid igitur?
ut qui rectam viam nescit, ubi,
ut fit, in plures vna diffinditur,
hæret anxius, nec singulas au-
det eligere, nec vniuersas pro-
bare: sic cui non est veri stabile
judicium, prout infida suspicio
spargitur, ita ejus dubia opinio
dissipatur. Nullum itaque mi-
raculum est, si *Cacilius* identi-
dem in contrarijs ac repugnan-
tibus jactetur, æstuet, fluctue-
tur: quod nè fiat vltèrius, con-
vincam, & redarguam quam-
vis diversa, quæ dicta sunt, vnâ
ve-

veritate confirmatâ , probatâ-
que: nec dubitandum ei de cæ-
tero est , nec vagandum. Et
quoniam meus frater erupit, æ-
grè se ferre, stomachari, indig-
nari, dolere, illiteratos, paupe-
res, imperitos , de rebus cæle-
stibus disputare ; sciat omnes
homines (sinè delectu ætatis,
sexus, dignitatis) rationis, &
sensus capaces & habiles pro-
creatos : nec fortunâ nactos,
sed naturâ indeptos esse sapi-
entiam. Quin ipsos etiam phi-
losophos, vel si qui alij artium
repertores in memorias exie-
runt, priusquàm solertiâ men-
tis parerent nominis clarita-
tem, habitos esse plebeios, in-
doctos, seminudos. At verò di-
vites facultatibus suis illiga-
tos magis aurum suspicere

44 *M. Minucij Felicis*

consuêsse quàm cœlum ; no-
 strates pauperes , & commen-
 tos esse prudentiam, & tradidis-
 se cæteris disciplinam. Vnde ap-
 paret, ingenium non dari facul-
 tatibus, nec studio parari, sed
 cum ipsâ mentis formatione
 generari. Nihil itaque indig-
 nandum vel dolendum, si qui-
 cunque de divinis quærat, sen-
 tiat, proferat; cum non dispu-
 tantis auctoritas, sed disputati-
 onis ipsius veritas requiratur.
 Atque etiam quo imperitior
 sermo, hoc illustrior ratio est:
 quoniam non fucatur pompâ
 facundiæ & gratiæ, sed, vt est,
 recti regula sustinetur. Nec
 recuso, quod *Cacilius* asserere
 inter præcipua connixus est,
 hominem nosse se, & circum-
 spicere debere, quid sit, vnde
 sit,

fit ; quare fit ; vtrum ele-
 mentis concretus , an con-
 cinnatus atomis , an potius à
 Deo factus, formatus, anima-
 tus. Quod ipsum explorare,
 & eruere, sine vniversitatis in-
 quisitione non possumus ; cum
 ita coherencia, connexa, con-
 catenata sint, vt, nisi divinitatis
 rationem diligenter excusseris,
 nescias humanitatis. Nec possis
 pulchrè gerere rem civilem,
 nisi cognoveris hanc commu-
 nem omnium mundi civita-
 tem: præcipuè cum à feris, bel-
 luis hoc differamus, quòd illa
 prona, in terramque vergentia,
 nihil nata sint prospicere , nisi
 pabulum: Nos quibus vultus
 erectus , quibus suspectus in
 coelum datus est, sermo, & ra-
 tio, per quæ Deum agnosci-
 mus,

46 M. Minucij Felicis

mus, sentimus, imitamur; ignorare, nec fas, nec licet, ingerentem sese oculis, & sensibus nostris cœlestem claritatem. Sacrilegij enim vel maximi instar est, humi quærere, quod in sublimi debeas invenire. Quò magis mihi videntur qui hunc mundi totius ornatum non, divinâ ratione perfectum volunt, sed frustis quibusdam temerè coherentibus conglobatum; mentem, sensum, oculos deniq; ipsos non habere. Quid enim potest esse tam apertum, tam confessum, tamque perspicuum, cum oculos in cœlum suffuleris, & quæ sunt infra, circaque lustraveris; quàm esse aliquod numen præstantissimæ mentis, quo omnis natura inspiretur, moveatur, alatur, guber-

gubernetur? Cœlum ipsum vide quàm latè tenditur, quàm rapidè volvitur, vel quod in noctem astris distinguitur, vel quod in diem sole lustratur: jam scies quàm sit in eo summi moderatoris mira, & divina libratio. Vide & annum vt solis ambitus faciat: & mensem vide, vt luna auctu, senio, labore circumagat. Quid tenebrarum & luminis dicam recursantes vices, vt sit nobis operis, & quietis alterna reparatio? Relinquenda verò Astrologis prolixior de syderibus oratio, vel quæ regant cursum navigandi, vel quæ arandi, metendique tempus inducant: quæ singula non modò vt crearentur, fierent, disponderentur, summi opificis & perfectę ra-

48 *M. Minucij Felicis*

rationis eguerunt; verumetiam
 sentiri, perspicere, intelligi, sine
 summâ solertiâ, & ratione non
 possunt. Quid cum ordo tem-
 porum, hæc frugum stabili va-
 rietate distinguitur, nonne au-
 ctorem suum, parentemque te-
 statur? Ver æquè cum suis flo-
 ribus, & æstas cum suis messi-
 bus, & autumnus maturitas gra-
 ta, & hyberna olivitas necessa-
 ria: qui ordo facillè turbaretur,
 nisi maximâ ratione consiste-
 ret. Iam providentiæ quantæ,
 ne hyems sola glacie vreret, aut
 sola æstas ardore torreret; au-
 tumni & veris inserere medi-
 um temperamentum: vt per
 vestigia sua anni revertentis
 occulti & innoxij transitus la-
 berentur. Mari intende, lege li-
 toris stringitur: quicquid ar-
 borum

borum est, vide, quàm è terræ
visceribus animatur. Aspice O-
ceanum, refluit reciprocis æsti-
bus: vide fontes, manant venis
perennibus: fluvios intuere,
eunt semper exercitis lapsibus.
Quid loquar aptè disposita re-
cta montium, collium flexa,
porrecta camporum? Quiduè
animantium loquar adversus
sefe tutelam multiformem? a-
lias armatas cornibus, alias den-
tibus septas, & fundatas vngu-
lis, & spicatas aculeis, aut pe-
dum celeritate liberas, aut cla-
tione pennarum? Ipsa præcipuè
formæ nostræ pulchritudo De-
um fatetur artificem; status ri-
gidus, vultus erectus, oculi in
summo, velut in speculâ con-
stituti; & omnes cæteri sensus
velut in arce compositi. Lon-

50 *M. Minucij Felicis*

gum est ire per singula : nihil in homine membrorum est, quod non & necessitatis causa sit & decoris. Et quod magis mirum est, eadem figura omnibus, sed quædam unicuique lineamenta deflexa : sic & similes vniversi videmur, & inter se singuli dissimiles inuenimur. Quid nascendi ratio? quid cupido generandi? nonne à Deo data est? & vt vbera partu maturescante lactescant, & vt tener foetus vbertate lacte roris adolescat? Nec vniversitati solummodò Deus, sed & partibus consulit. Britannia sole deficitur, sed circumfluentis maris tepore recreatur: Ægypti siccitatem temperat Nilus; colit Euphrates Mesopotamiam; Indus & serere Ori-

Orientem dicitur, & rigare.
Quòd si ingressus aliquam domum, omnia exculta, disposita, ornata vidisses; vtrisque præesse ei crederes dominum, & illis bonis rebus multò esse meliorem. Ita in hâc mundi domo, cum cœlum terramque perspicias, providentiam, ordinem, legem, crede esse universitatis dominum, parentemque ipsis syderibus, & totius mundi partibus pulchriorem. Ni fortè, quoniam de providentiâ nulla dubitatio est, inquirendum putas, vtrum vnius imperio, an arbitrio plurimorum cœleste regnum gubernetur: quod ipsum non est multilaboris aperire cogitanti imperia terrena, quibus exempla vtrique de cœlo. Quando vnquam regni

52 M. Minucij Felicis

regni societas aut cum fide
 cœpit, aut sine cruore de-
 sijt? Omitto *Persas* de equorum
 hinnitu augurantes principa-
 tum, & *Thebanorum* præmortu-
 am fabulam transeo: Ob pasto-
 rum & casę regnum de geminis
 historia notissima est: Generi &
 Soceri bella toto orbe diffusa
 sunt; & tam magni imperij du-
 os fortuna non cepit. Vide cæ-
 tera: rex vnus apibus, dux v-
 nus in gregibus, in armentis
 rector vnus. Tu in cœlo sum-
 mam potestatē dividi credas, &
 scindi veri illius ac divini im-
 perij totam potestatem? cum
 palam sit parentem omnium
 Deum, nec principium habere,
 nec terminum; qui nativitatem
omnibus præstet, sibi perpetui-
tatem; qui ante mundum fuerit
 sibi

sibi ipse pro mundo ; qui vni-
versa quaecunque sunt verbo
jabet, ratione dispensat, virtute
consummat. Hic nec videri
potest , visu clarior est ; nec
comprehendi, tactu purior est ;
nec aestimari , sensibus major
est ; infinitus, immensus, & soli
sibi, tantus quantus est, notus.
Nobis verò ad intellectum pe-
ctus angustum est ; & ideo sic e-
um dignè estimamus, dum inæ-
stimabilem dicimus. Eloquar
quemadmodum sentio ; magni-
tudinem Dei, qui se putat nosse,
minuit : qui non vult minuire,
non novit. Nec nomen Dei
quæras ; Deus nomen est. Illic
vocabulis opus est , cum per
singulos proprijs appellationū
insignibus multitudo dirimen-
da est. Deo, qui solus est, Deus
voca-

54 *M. Minucij Felicis*

vocabulum totum est. Quem si patrem dixero, terrenum opineris; si regem, carnalem suspiceris; si dominum, intelliges utiq; mortalem. Aufer additamenta nominum, & perspicies ejus claritatem. Quid quod omnium de isto habeo consensum? Audio vulgus, cum ad coelum manus tendunt, nihil aliud quàm *Deum* dicunt: &, *Deus magnus est*; &, *Deus verus est*; &, *Si Deus dederit*. Vulgi iste naturalis sermo est, an Christiani confitentis oratio? Et qui *Iovem* principem volunt, falluntur in nomine, sed de vnâ potestate consentiunt. Audio poetas quoque vnum patrem diuûm atque hominum prædicantes; & talem esse mortalium mentem, qualem parens omnium

nium Deus induxerit. Quid Mantuanus Maro? Nonne apertius, proximius, verius; Principio (ait) cœlum, & terras & cœtera mundi membra spiritus intus alit, & infusa mens agitat? Inde hominum, pecudumque genus, & quicquid aliud animalium. Idem alio loco mentem istam & spiritum Deum nominat. Hęc enim ejus verba sunt:

Georg. 4.

--Deum namque ire per omnes
Terrasque tractusque maris, cœ-
lumque profundum:

Hinc pecudes, armenta, viros, ge-
nus omne ferarum &c.

Et quid aliud à nobis Deus,
quàm mens, & ratio, & spiritus
prædicatur? Recenseamus, si
placet, disciplinam philoso-
phorum; deprehendes eos, et si
sermo-

56 *M. Minucij Felicis*

sermonibus varijs, ipsis tamen rebus in hanc vnam coire & conspirare sententiam. Omitto illos rudes & veteres; qui de suis dictis sapientes esse meruerunt. Sit *Thales Milesius* omnium primus, qui primus omnium de cœlestibus disputavit. Is rerum initium, aquam dixit: Deum autem eam mentem, quæ ex aquâ cuncta formaverit: & altior & sublimior aquæ, & spiritus ratio, quàm vt ab homine potuerit inveniri, à Deo tradita. Vides philosophi principalis nobiscum penitus opinionem consonare. *Anaximenes* deinceps, & post *Apolloniatas* *Diogenes*, aëra Deum statuunt, infinitum & immensum. Horum quoque similis de divinitate consensus est. *Anaxagora*
verò

verò descriptio & modus infinitæ mentis, Deus dicitur. Et *Pythagoræ*, Deus est animus, per vniuersam rerum naturam commean's, & intentus; ex quo etiam animalium omnium vita capiatur. *Xenophanem* notum est, omne infinitum cum mente, Deum tradere: & *Antisthenem*, populares deos multos, sed naturalem vnum præcipuum: *Spensippum*, vim naturalem, animalem, quâ omnia regantur, Deum nosse. Quid *Democritus*; quamvis *atomorum* primus inventor, nonne plerunque naturam, quæ imagines fundat, & intelligentiam, Deum loquitur? *Straton* quoque & ipse naturam. Etiam *Epicurus* ille, qui deos aut ociosos fingit, aut nullos; naturam tamen

58 M. Minucij Felicis

men superponit. *Aristoteles* variat, & assignat tamen vnam potestatem; nam interim mentem, mundum interim Deum dicit; interim ^{modo} Deum præficit. *Heraclides Ponticus* quoque Deo divinam mentem quamvis variè adscribit. *Theophrastus*, & *Zenon*, & *Chrysippus*, & *Cleanthes*, sunt & ipsi multiformes, sed ad vnitatem providentiæ omnes revolvuntur. *Cleanthes* enim mentem, modo animum, modo æthera, plerunque rationem Deum differuit. *Zenon* ejusdem magister, naturalem legem atque divinam & æthera interim, interdumque rationem, vult omnium esse principium: idem interpretando *Iunonem*, acra; *Iovem*, cœlum; *Neptunum*, mare; ignem

nem esse *Vulcanum*; & cæteros
similiter vulgi deos, elementa
esse monstrando; publicum ar-
guit graviter, & revincit erro-
rem. Eadem ferè *Chrysippus*,
vim divinam, rationalem natu-
ram, & mundum interim & fa-
talem necessitatem Deum cre-
dit: *Zenonemque* interpreta-
tione physiologiæ in *Hesiodi*,
Homeri, *Orpheique* carmini-
bus imitatur. *Babylonio* etiam
Diogeni disciplina est expo-
nendi, & differendi, *Iovis* par-
tum, & ortum *Minerva*, & hoc
genus cæterarum rerum voca-
bula esse, non deorum. Nam
Socraticus Zenophon formam
Dei veri negat videri posse, &
ideò quæri non oportere: *Ari-
sto Chius* comprehendere non
posse. Vterque Majestatem
Dei,

60 *M. Minucij Felicis*

Dei, intelligendi desperatione
 senserunt. *Platoni* apertior de
 Deo, & rebus ipsis, & nomi-
 nibus oratio est; & quæ tota
 esset cœlestis, nisi persuasionis
 civilis nonnunquam admixtio-
 ne sordesceret. *Platoni* itaque
 in *Timæo* Deus est ipso nomi-
 ne mundi parens, artifex ani-
 mæ, cœlestium, terrenorumque
 fabricator: quem & invenire
 difficile præ nimia & incredi-
 bili potestate; & cum inveneris
 in publicum dicere, impossibile
 præfatur. Eadem ferè & ista
 quæ nostra sunt: nam & Deum
 novimus, & parentē omniū di-
 cimus, & nunquam publicè nisi
 interrogati prædicamus. Expo-
 sui opiniones omnium fermè
 philosophorū, quibus illustrior
 gloria est, Deum vnum multis
 licet

licet designasse nominibus: ut
quivis arbitretur, aut nunc
Christianos philosophos esse,
aut philosophos fuisse jam tunc
Christianos. Quod si provi-
dentiâ mundus regitur, & uni-
us Dei nutu gubernatur, non
nos debet antiquitas imperito-
rum fabellis suis delectata vel
capta, ad errorem mutui rapere
consensus: cum philosophorum
suorum sententijs refellatur,
quibus & rationis & vetustatis
assistit auctoritas. Majoribus
enim nostris tam facilis in men-
dacijs fides fuit, ut temerè cre-
diderint etiam alia monstrosa
miracula: *Scyllam* multiplicem,
Chimaram multiformem, &
Hydrum fœlicibus vulneribus
renascentem, & *Centauros*, e-
quos hominibus implexos: &
quic-

62 *M. Minucij Felicis*

quicquid famæ licet fingere,
 illis erat libenter audire. Quid
 illas aniles fabulas, de homini-
 bus aves, de feris homines, &
 de hominibus arbores atq; flo-
 res? quæ si essent facta, fierent
 quæ fieri non possunt, ideò nec
 facta sunt. Similiter verò erga
 deos quoque Majoꝛes nostri
 improvidi, creduli, rudi simpli-
 citate crediderunt; dum reges
 suos colunt religiosè, dum de-
 functos eos desiderant in ima-
 ginibus videre, dum gestiunt
 eorum memorias in statuis de-
 tinere; sacra facta sunt, quæ fue-
 rant assumpta solatia. Denique
 & antequam commercijs or-
bis pateret, & antequam gentes
ritus suos, moresque misce-
 rent, vnaquęque natio condito-
 rem suum, aut ducem inclytum,
 aut

aut reginam pudicam sexu suo
fortiorem, aut alicujus mune-
ris vel artis repertorum véné-
rabatur, vt civem bonæ memo-
riæ. Sic & defunctis præmium,
& futuris dābatur exemplum.
Lege Historicorum scripta, ea-
dem mecum recognosces, ob
merita virtutis aut muneris
deos habitos. *Euhemerus* exe-
quitur & eorum natales, patri-
as, sepulchra dinumerat, & per
provincias demonstrat; *Dictæ*
Iovis, & *Apollinis Delphici*, &
Phariæ Isidis, & *Cereris Elu-*
sinia. Assumptos in deos loqui-
tur, qui errando inventis novis
frugibus vtilitati hominum
profuere. In eandē sententiam
& *Persæus* philosophatur, & an-
nectit inventas fruges, & fru-
gum ipsarum repertoires iisdem
no-

64 M. Minucij Felicis

nominibus; vt Comicus sermo est, *Venerem sine Libero & Cerere frigere.* *Alexander* ille Magnus insigni volumine ad matrem suam scripsit, metu suæ potestatis proditum sibi de dijs hominibus à sacerdote secretum: ille *Vulcanum* facit omnium principem, & postea *Iovis* gentem. Despicit *Isidis* ad hirundinem sistrum, & dispersis membris inanem tui *Serapidis* sive *Osiridis* tumulum. Considera denique sacra ipsa & mysteria: invenies exitus tristes, fata, & funera, & luctus atque plangitum miserorum deorum. *Isis* perditum filium cum *Cynocephalo* suo, & alijs sacerdotibus luget, plangit, inquit; & *Isaci* miseri cædunt pecto-

pectora, & dolorem infelicissimæ matris imitantur. Mox invento parvulo gaudet Isis, exultant sacerdotes, *Cynocephalus* inventor gloriatur: nec desinunt annis omnibus, vel perdere quod inveniunt, vel invenire quod perdunt. Nonne ridiculum est, vel lugere quod colas, vel colere quod lugeas? Hæc tamē *Ægyptia* quondam, nunc & sacra *Romana* sunt. *Ceres* facibus accensis, & serpente circumlita, errore subreptam, & corruptam *Liberam* anxia & sollicita vestigat. Hæc sunt *Elisina*. At quæ *Iovis* sacra sunt? nutrix capella est, & avido patri subtrahitur infans, ne voretur: & *Corybantum* cymbalis, ne pater audiat vagitus, tinnitus eliditur. De *Cybe-*

D

le

66 *M. Minucij Felicis*

le Dyndimenâ pudet dicere,
 quæ adulterum suum infelici-
 ter placitum, quoniam & ipsa
 deformis & vetula (vt multo-
 rum deorum mater) ad stuprum
 illicere non poterat, execut, vt
 deum scilicet faceret ênuchum.
 Propter hanc fabulam *Galli* e-
 am, & semiviri sui corporis
 supplicio colunt. Hæc jam non
 sunt sacra; tormenta sunt. Quid
 formæ ipsæ, & habitus? nonne
 arguunt ludibria & dedecora
 deorum vestrorum? *Vulcanus*
 claudus deus, & debilis; *Apol-
 lo* tot ætatibus levis; *Æsculapi-
 us* benè barbatus, etsi semper
 adolescentis *Apollinis* filius;
Neptunus glaucis oculis; *Mi-
 nerva* cœsijs; bubulis *Iuno*; pe-
 dibus *Mercurius* alatis; *Pan* vn-
 gulatis; *Saturnus* compeditis;
Ianus

Ianus verò frontes duas gestat, quasi & averſus incedat; *Diana* interim eſt altè ſuccincta venatrix; & *Ephēſia* mammis multis, & vberibus extructa; & *Trivia* trinis capitibus, & multis manibus horrifca. Quid ipſe *Iupiter* veſter? modo imberbis ſtatuitur, modo barbatus locatur; & cum *Hammon* dicitur, habet cornua; & cum *Capitolinus*, tunc gerit fulmina; & cum *Latialis* cruore perfunditur; & cum *Feretrius* non auditur. Et ne longius multos *Ioves* obeam, tot ſunt *Iovis* monſtra, quot nomina. *Erigone* ſuſpenſa de laqueo eſt, vt virgo inter aſtra, ignita ſit. *Caſtores* alternis moriuntur, vt vivant: *Æſculapius* vt in deum ſurgat, fulminatur:

68 M. Minucij Felicis

Hercules, vt hominem exuat,
Oetais ignibus concrematur.
 Has fabulas & errores, & ab
 imperitis parentibus discimus,
 & (quod est gravius) ipsis stu-
 dijs & disciplinis elaboramus,
 carminibus præcipuè poëta-
 rum: qui, permirum, quantum
 veritati ipsi suâ auctoritate no-
 cuere. Et *Plato* ideò præclare
Homerum illum inclytum, lau-
 datum & coronatum, de ci-
 uitate, quam in sermone insti-
 tuebat, eiecit. Hic enim præci-
 puus bello *Troico* deos ve-
 stros, etsi ludos facit, tamen in
 hominum rebus & actibus mis-
 cuit. Hic eorum paria com-
 posuit, fauciauit *Venerem*,
Martem vinxit, vulneravit, fu-
 gavit. *Iovem* narrat à *Briareo*
 liberatum, ne à dijs cæteris li-
 garetur.

garetur: & *Sarpedonem* filium,
quoniam morti non poterat e-
ripere, cruentis imbris fle-
visse: & cesto *Veneris* illectum,
flagrantius quàm in adulteras
soleat, cum *Iunone* vxore con-
cumbere. Alibi *Hercules* ster-
cora egerit, & *Apollo*, *Admeto*
pecus pascit. *Laomedonti* verò
muros *Neptunus* instituit, nec
mercedē operis infelix structor
accepit. Illic *Vulcanus* *Iovis* ful-
men cum *Aeneæ* armis in incu-
de fabricatur: cum cœlū, & ful-
mina, & fulgura longè ante fue-
rint, quàm *Iupiter* in *Creta* nas-
ceretur; & flammæ veri fulmi-
nis, nec *Cyclops* potuerit imi-
tari, nec ipse *Iupiter* non vereri.
Quid loquar *Martis* & *Veneris*
adulterium deprehensum? & in
Ganymedem *Iovis* stuprum cœ-

70 *M. Minucij Felicis*

lo consecratum? Quæ omnia in hoc prodita, ut vitijs hominum quædam auctoritas pararetur. His, atque hujusmodi figmentis, & mendacijs dulcioribus corrumpuntur ingenia puerorum; & ijsdem fabulis inhaerentibus, adusque summæ ætatis robur adolescunt; & in ijsdem opinionibus miseri convescunt: cum sit veritas obvia sed requirentibus. *Saturnum* enim principem hujus generis & examinis, omnes scriptores vetustatis, *Græci Romanique* hominem prodiderunt. Scit hoc *Nepos*, & *Cassius* in *Historiâ*, & *Thallus*, ac *Diodorus* hoc loquuntur. Is itaque *Saturnus* *Cretâ* profugus, *Italiam* metu filij sævientis accessit, & *Iani* susceptus hospitio, rudes

rudes illos homines & agrestes multa docuit, (vt Græculus & politus,) literas imprimere, nummos signare, instrumenta conficere. Itaq; latebram suam quòd tutò latuisset, vocari maluit *Latium*; et urbem *Saturniam* de suo nomine; & *Ianiculum* *Ianus*, ad memoriam vterque posteritatis reliquerunt. Homo igitur utique qui fugit, homo utique qui latuit, & pater hominis, & natus ex homine. Terræ enim, & cœli filius, quòd apud *Italos* esset ignotis parentibus, proditus est: vt in hodiernum inopinatò visos, cœlo missos; ignobiles, & ignotos, terræ filios nominamus. Ejus filius *Iupiter Creta*, excluso parente, regnavit, illic obiit, illic filios habuit; ad-

72 *M. Minucij Felicis*

huc antrum *Iovis* visitur, & sepulchrum ejus ostenditur, & ipsis sacris suis humanitatis arguitur. Ociolum est ire per singulos, & totam seriem generis istius explicare, cum in primis parentibus probata mortalitas, in cæteros ipso ordine successionis influxerit. Nisi forte post mortem deos fingitis, & pejerante *Proculo* deus *Romulus*, & *Iuba Mauris* volentibus deus est; & divi cæteri reges, qui consecrantur non ad fidem numinis, sed ad honorem emeritæ potestatis. Invitis denique hoc nomen adscribitur: optant in homine perseverare: fieri se deos metuant; & etiamsi senes nolunt. Ergo nec de mortuis dii sunt, quoniam Deus mori non potest: nec de natis,

natis, quoniam moritur omne
quod nascitur. Divinum autem
id est, quod nec ortum habet,
nec occasum. Cur enim si nati
sunt, non hodieque nascuntur;
nisi fortè jam *Iupiter* senuit, &
partus in *Iunone* defecit; &
Minerva canuit antequam pe-
perit? An ideo cassavit ista ge-
neratio quoniam nulla hujus-
modi fabulis præbetur assen-
sio? Cæterum si dii creari pos-
sent, interire non possent; plu-
res totis hominibus deos ha-
beremus; ut jam eos nec cœ-
lum contineret, nec aer cape-
ret, nec terra gestaret. Vnde
manifestum est, homines illos
fuisse, quos & natos legimus,
& mortuos scimus. Quis ergo
dubitatur horum imagines con-
secratas vulgus orare, & pub-

D si

licè

74 *M. Minucij Felicis*

licè colere? dum opinio, & mens imperitorum artis concinnitate decipitur, auri fulgore perstringitur, argenti nitore, & candore eboris hebetatur? Quòd si in animum quis inducat, tormentis quibus, & quibus machinis simulacrum omne formetur; erubescet timere se materiem ab artifice, vt deum faceret, illusam. Deus enim ligneus, rogi fortassè vel infœlicis stipitis portio, suspenditur, cœditur, dolatur, runcinatur. Et Deus æreus vel argenteus de immundo vasculo (vt sæpius factum *Ægyptio* regi) conflatur, tunditur malleis, in incudibus figuratur: & lapideus cœditur, scalpitur, & ab imperito homine levigatur. Nec sentit suæ nativitat

injuriā, ita ut nec postea de
vestra veneratione culturam:
nisi forte nondum deus saxum
est, vel lignum, vel argentum.

Quando igitur hic nascitur?
ecce funditur, fabricatur, scal-
pitur, nondum deus est. Ecce
plumbatur, construitur, erigi-
tur nec adhuc deus est. Ecce
ornatur, consecratur, oratur:
tunc postremo deus est, cum
homo ille voluit, & dedicavit.

Quanto verius de dijs vestris
animalia muta naturaliter ju-
dicant, mures, hirundines, mil-
vi: non sentire eos sciunt, ro-
dunt, insultant, insident: ac nisi
abigatis, in ipso dei vestri ore
nidificant. Araneæ verò faciem
ejus intexunt, & de ipso capite
sua fila suspendunt: vos tergi-
tis, mundatis, eraditis; illos,
quos

76 *M. Minucij Felicis*

quos facitis, protegitis, & timetis. Dum unusquisque vestrum non cogitat, prius se debere Deum nosse, quam colere; dum inconsultè gestiunt parentibus obedire; dum fieri malunt alieni erroris accessio, quam sibi credere; dum nihil ex his quæ timent, norunt: sic in auro & argento avaritia consecrata est; sic statuarum inanum consignata forma; sic nata Romana superstitio, quorum ritus si percenseas, ridenda quam multa, multa etiam miseranda sunt. Nudi crudâ hyeme discurrunt, alij incedunt pileati, scuta vetera circumferunt, pelles cædunt, mendicantes vicatim deos ducunt. Quædam fana semel anno adire permittunt; quædam in totum nefas visere est:

est: quædam viro non licet, non-
nulla absque fœminis sacra
sunt: Etiam servo quibusdam
cæremonijs interesse piaculare
flagitium est. Alia sacra coronæ
vnivira, alia multivira, & mag-
nâ religione conquiritur, quæ
plura possit adulteria numera-
re. Quid? qui sanguine suo li-
bat, & vulneribus suis suppli-
cat, non profanus melius esset,
quàm sic religiosus? aut cui te-
stâ sunt obscena demessa, quo-
modo deum violat, qui hoc
modo placatur? cum si eunuchos
Deus vellet, posset procreare,
non facere. Quis non intelligat
malesanos, & vanæ & perditæ
mentis in ista dissipere, & ip-
sam errantium turbam mutua
sibi patrocinia præstare? Hic
defensio communis furoris est
fu-

78 *M. Minucij Felicis*

furentium multitudo. Attamen
 ista ipsa superstitio *Romanis*
 dedit, auxit, fundavit imperi-
 um, cum non tam virtute,
 quam religione, & pietate pol-
 lerent. Nimirum insignis, & no-
 bilis justitia *Romana* ab ipsis
 Imperij nascentis incunabilis
 auspicata est. Nonne in ortu suo
 & scelere collecti, & minuti,
 immanitatis suæ terrore cre-
 verunt? Nam asylo prima plebs
 congregata est: confluxerant
 perdit, facinorosi, incesti, sica-
 rij, proditores. Et ut ipse *Ro-
 mulus*, imperator & rector,
 populum suum facinore præ-
 celleret, parricidium fecit. Hæc
 prima sunt auspicia religiosæ
 civitatis. Mox alienas virgines
 jam desponsatas, jam destina-
 tas, & nonnullas de matrimo-
 nio

nio mulierculas sine more rapuit, violavit, illufit: & cum earum parentibus, id est, cum foceris fuis, bellum miscuit, propinquum sanguinem fudit. Quid irreligiofius, quid audacius, quid ipfâ sceleris confidentiâ tutius? Iam finitimos agro pellere, civitates proximas evertere, cum templis & altaribus: captos cõgere, damnis alienis & fuis fcleribus adolefcere. Cum *Romulo*, regibus cæteris, & postumis ducibus disciplina communis est. Ita quicquid *Romani* tenent, colunt, possident, audaciæ præda est. Tempia omnia de manubijs, de ruinis vrbium, de fpolijs deorum, de cædibus sacerdotum. Hoc infultare & illudere est, victis religionibus fer-
vire,

80 *M. Minucij Felicis*

vire, & captivas eas post victorias adorare. Nam adorare, quæ manu ceperis; sacrilegium est consecrare, non numina. Toties ergo à *Romanis* impiatum est, quoties triumphatum; tot de dijs spolia, quot de gentibus & tropæa. Igitur *Romani* non ideò tanti, quòd religiosi, sed quòd impunè sacrilegi. Neque enim potuerunt in ipsis bellis deos adjuutores habere, adversus quos arma rapuerunt, & quos post cladem triumphatos colere cœperunt. Quid autem isti dij pro *Romanis* possunt, qui nihil pro suis adversus eorum arma valuerunt? *Romanorum* enim vernaculos deos novimus. *Romulus*, *Picus*, *Tibernius*, & *Consus*, & *Pilumnus*, ac *Picumnus*. *Cloacina*
Tatius

Tatius & invenit, & coluit:
Pavorem Hostilius atque *Pal-*
lorem: mox à nescio quo *Fe-*
bris dedicata. Hæc alumna *Vr-*
bis istius superstitio, morbi &
 malæ valetudines. Sanè & *Ac-*
ca Laurentia, & *Flora*, mere-
 trices propudiosæ inter mor-
 bos *Romanorum*, & deos com-
 putandæ. Isti scilicet adversus
 cæteros, qui in gentibus cole-
 bantur, *Romanorum* imperium
 protulerunt. Neque enim eos
 adversum eos homines vel
Mars Thracius, vel *Jupiter*
Creticus, vel *Iuno* nunc *Argi-*
va, nunc *Samia*, nunc *Pæna*, vel
Diana Taurica, vel mater *Idea*,
 vel *Ægyptia* illa non numina,
 sed portenta juverunt. Nisi
 fortè apud istos major castitas
 virginum, aut religio sanctior
 facer-

82 *M. Minucij Felicis*

sacerdotum; cū penē in pluribus virginibus (ut quæ inconsultius se viris miscuissent) *Vestā* sanē sit nesciente incestum vindicatum: in residuis impunitatem fecerit, non castitas tutor, sed impudicitia felicitior. Vbi autem magis à sacerdotibus, quàm inter aras, & delubra condicuntur stupra, tractantur lenocinia, adulteria meditantur? frequentius denique in ædituorum cellulis, quàm in ipsis lupanaribus, flagrans libido defungitur. Et tamen ante eos Deo dispensante diu regna tenuerunt *Assyrij, Medi, Persæ, Græci* etiam, & *Ægyptij*, cum *Pontifices, & Arvales, & Salios, Vestales & Augures* non haberent; nec pullos caveâ reclusos, quorum cibo, vel fastidio

dio, respublica summa regere-
tur. Iam enim venio ad illa au-
spicia & auguria *Romana*, quæ
summo labore collecta testatus
es, & pœnitenter omiſſa, & ob-
servata feliciter. *Clodius* ſcili-
cèt, & *Flaminius*, & *Innius*
ideò exercitus perdiderunt,
quòd pullorum ſoliſtimum tri-
pudium expectandum non pu-
taverunt? Quid *Regulus*? non-
ne auguria ſervavit, & captus
eſt? *Mancinus* religionem te-
nuit, & ſub jugum miſſus eſt, &
deditus? Pullos edaces habuit &
Paulus, apud *Cannas* tamen cum
majore Romani populi parte
proſtratus eſt. *C. Caſar*, ne an-
te brumam in Africam navigia
transmitteret augurijs, & au-
ſpicijs retinentibus, ſprevit: eo
faciliùs & navigavit, & vicit.

Quæ

84 M. Minucij Felicis

Quæ vero & quanta de oraculis prosequar? Post mortem *Amphiaræus* ventura respondit, qui proditum iri sese obmonile ab vxore nesciebat. *Tiresias* cæcus futura videbat, qui præsentia non videbat. De *Pyrro*, *Ennius Appollinis Pythij* responsa confinxit, cum jam *Apollo* versus facere desisset: cujus nunc cautum illud & ambiguum defecit oraculum, cum & politiores homines & minus creduli esse cœperunt. Et *Demosthenes*, quod sciret responsa simulata, οἱ ληπίζην *Pythiam* querebatur. At nonnunquam tamen veritatem vel auspicia vel oracula tetigere. Quanquam inter multa mendacia videri possit industriâ casus imitatus, aggrediar tamen fontem

fontem ipsum erroris, & prav-
tatis vnde omnis caligo ista ma-
navit, & altiùs eruere, & aperi-
re manifestiùs. Spiritus sunt in-
sinceri, & vagi, a cœlesti vigo-
re terrenis labibus & cupidita-
tibus degravati: Isti igitur Spi-
ritus posteaquam simplicitatē
substantiæ suæ, onusti, & im-
mersi vitijs, perdiderunt, ad so-
latium calamitatis suæ non de-
sinunt perditi jam perdere; &
depravati errorem pravitatis
infundere, & alienati à Deo in-
ductis pravis religionibus à
Deo segregare. Eos spiritus dē-
monas esse poëtę sciunt, Philo-
sophi differunt, *Socrates* novit,
qui ad nutū, & arbitriū assidentis
sibi dēmonis vel declinabat ne-
gotia, vel petebat. Magi quoq;
non tantum sciunt dēmonas, sed
etiam quic-

86 M. Minucij Felicis

quicquid miraculi ludunt, per
dæmonas faciunt: illis aspiran-
tibus & infundētibus præstigias
edunt; vel quæ non sunt, videri;
vel quæ sunt, non videri. Eorum
Magorum et eloquio et negotio
primus *Hofiahnes*, & verum De-
um meritâ maiestate prosequi-
tur; & angelos, id est, ministros
& nuncios Dei (sed veri) ejus
venerationi novit assistere; ut
& nutu ipso, & vultu Domini
territi contremiscant. Idem e-
tiam dæmonas prodidit terre-
nos, vagos, humanitatis inimi-
cos. Quid *Plato*, qui invenire
Deum negotium credidit?
nonne & angelos sine negotio
narrat & dæmonas? & in *Sym-
posio* etiam suo naturam dæ-
monum exprimere connititur?
Vult enim esse substantiam inter
mor-

mortalem, immortalemque, id est, inter corpus & spiritum, mediam, terreni ponderis & cœlestis levitatis admixtione concretam; ex quâ manare in nos cupidinem amoris dicit, & informari, & illabi pectoribus humanis, & sensum movere & affectus fingere, & ardorem cupiditatis infundere. Isti igitur impuri spiritus (ut ostensum à *Magis*, à *Philosophis*, & à *Platone*) sub statuis, & imaginibus consecratis delitescunt; & afflatu suo auctoritatem quasi præsentis numinis consequuntur; dum inspirantur interrim vatibus, dum fanis immorantur, dum nonnunquam extorum fibras animant, avium volatus gubernant, sortes regunt, oracula efficiunt falsis plu-

88 *M. Minucij Felicis*

pluribus involuta. Nam & falluntur & fallunt, vt & nescientes sinceram veritatē, & quam sciunt, in perditionem sui non confitentes. Sic à cœlo deorsum gravant, & à Deo vero ad materias avocant, vitam turbant, somnos inquietant; irrepentes etiam corporibus occultè, vt Spiritus tenaces, morbos fingunt, terrent mentes, membra distorquent, vt ad cultum sui cogant: vt nidore altarium, vel hostijs pecudum saginati, remissis, quæ constrinxerant, curasse videantur. Hi sunt & furentes, quos in publicum videtis excurrere: vates et ipsi absque templo sic insaniunt, sic bacchantur, sic rotantur. Par & in illis instigatio dæmonis, sed argumētum dispar furoris.

ris. De ipsis etiam illa; quæ paulo ante tibi dicta sunt, vt *Iupiter* ludos repeteret ex somnio, vt cum equis Castores viderentur, vt cingulum matronę navicula sequeretur. Hęc omnia sciunt plerique vestrum ipsos dæmonas de semetipsis confiteri; quoties à nobis & tormentis verborum, & orationis incendijs de corporibus exiguntur. Ipse *Saturnus*, & *Serapis*, & *Iupiter*, & quicquid dæmonum colitis, victi dolore; quod sunt, eloquuntur: nec vtiq; in turpitudinem sui nonnullis præsertim vestrum assistentibus, mentiuntur. Ipsis testibus esse eos dæmonas de se verū confitentibus credite. Adjurati enim per Deum verum & solū, inviti miseris corporibus inhærescunt: & vel

E

exili-

90 *M. Minucij Felicis*

exiliunt statim, vel evanescunt
 gradatim; prout fides patientis
adjuvat, aut gratia curantis as-
pirat. Sic Christianos de pro-
 ximo fugitant, quos longè in
 cœtibus per vos laceſſebant.
 Ideò inserti mentibus imperi-
 torum, odium nostri serunt oc-
 cultè per timorem. Naturale
 est enim & odisse, quem times,
 & quem metueris, inſeſtare, si
 possis. Sic occupant animos, &
 obſtruunt pectora, vt antè nos
 incipiant homines odisse, quàm
 noſſe : ne cognitos aut imitari
 possint, aut damnare non pos-
 sint. Quàm autem iniquum sit,
 de incognitis, & inexploratis
 judicare (quòd facitis) nobis
 ipsis pœnitentibus credite. Et
 nos enim idem fuimus, & ea-
 dem vobiscum quondam adhuc
 cœci

cœci, & hebetes sentiebamus: quasi Christiani monstra colerent, infantes vorarent, convivia incesta miscerent. Nec intelligebamus ab his fabulas istas semper ventilari, & nunquam vel investigari, vel probari; nec tanto tempore aliquem existere, qui proderet, non tantum facti veniam, verum etiam indicij gratiam consecuturum. Malum autem adeò non esse, ut Christianus reus nec erubesceret, nec timeret, & vnum solummodò, quòd non ante fuerit, poeniteret. Nos tamen cum sacrilegos aliquos, & incestos, parricidas etiam, defendendos & tuendos suscipiebamus, hos nec audiendos in totum putabamus. Nonnunquam etiam miserantes eorum cru-

92 *M. Minucij Felicis*

delius sæviebamur, vt urgere-
mûs confitentes ad negandum,
videlicet ne perirent; exercen-
tes in his perversam quæstio-
nem, non quæ verû erueret, sed
quæ mendacium cogeret. Et si
quis infirmior malo pressus &
victus Christianum se negasset;
favebamus ei, quasi ejerato no-
mine, jam omnia facta sua illâ
negatione purgaret. Agnos-
citis-ne eadem nos sensisse &
egisse, quæ sentitis & geritis?
cum, si ratio, non instigatio dæ-
monis judicaret, urgendi ma-
gis, non vt diffiterentur se
Christianos, sed vt de incestis
stupris, de impiatis sacris, de
infantibus immolatis fateren-
tur. His enim & hujusmodi fa-
bulis iidem dæmones ad exe-
crationis horrorē imperitorum
aures

aures adversus nos referse-
runt. Nec tamen mirum,
cum omnium fama, quæ sem-
per in iparsis mendacijs ali-
tur, ostensâ veritate consu-
mitur. Sic est negotium dæ-
monum: ab ipsis enim rumor
falsus & feritur, & fovetur.
Inde est quod audire te di-
cis, caput asini rem nobis esse pag: 24.
divinam. Quis tam stultus ut
hoc colat? quis stultior ut
hoc coli credat? nisi quod vos
& totos asinos in stabulis, cum
vestrâ *Hipponâ* consecratis; &
eosdem asinos cum *Iside* reli-
giosè devotatis: item boum
capita, & capita vervecum,
& immolatis, & colitis; de
capro etiam, & homine mix-
tos, & leonum, & canum
vultu deos dedicatis. Nonne

94 *M. Minucij Felicis*

& *Apim* bovem cum *Ægypti-*
is adoratis, & pascitis? Nec eo-
rum sacra damnatis instituta
serpentibus, crocodilis, & bel-
luis cæteris, & avibus, & pisci-
bus, quorum aliquem deum si
quis occiderit, etiam capite
punitur. Iidem *Ægyptij* cum
plerisque vobis non magis *Isi-*
dem, quàm *ceparum* acrimoni-
as metuunt: nec *Serapidem*
magis quàm *crepitus* per pu-
denda corporis expressos ex-
tremiscunt. Etiam ille, qui de
adoratis sacerdotis virilibus
adversum nos fabulatur, tentat
in nos conferre, quæ sua sunt.
Ista enim impuditiæ eorum
forsitan sacra sint, apud quos
sexus omnis membris omni-
bus prostat; apud quos tota
impudicitia vocatur urbani-
tas;

tas; qui scortorum licentiæ in-
vident, qui medios viros lam-
bunt, libidinoso ore inguinibus
inhærescunt : homines malæ
linguæ, etiamsi tacerent; quos
prius tædescit impuditiæ suæ,
quàm pudescit. Prò nefas, id
in se pessimi facinoris admit-
tunt, quod nec ætas potest pati
mollior, nec cogi servitus du-
rior. Hæc & hujusmodi pro-
pudia nobis non licet nec audi-
re: etiam pluribus turpe defen-
dere est. Ea enim de castis fin-
gitis, & pudicis, quæ fieri non
crederemus, nisi de vobis pro-
baretis. Nam quod religioni
nostræ hominem noxium, &
crucem ejus adscribitis; longè
de viciniâ veritatis erratis, qui
putatis Deum credi, aut meru-
isse noxium, aut potuisse terre-

96 *M. Minucij Felicis*

num. Næ ille miserabilis, cujus
 in homine mortali spes omnis
 innititur. Totum enim ejus au-
 xilium cum extincto homine
 finitur. *Aegyptij* sanè hominem
 sibi quem colant, eligunt, illum
 vnum propitiant, illum de om-
 nibus consulunt, illi victimas
 cædunt: & ille qui cæteris de-
 us, sibi certè homo est, velit no-
 lit. Nec enim conscientia suam
 decipit, si fallit alienam. Etiam
 principibus & regibus, non vt
 magnis & electis viris (sicut
 fas est) sed vt deis turpiter a-
 dulatio falsa blanditur; cum &
 præclaro viro honor veriùs, &
 optimo amor dulciùs præbea-
 tur. Sic eorum numen invo-
 cant, ad imagines supplicant,
 genium [id est, dæmonem]
 ejus implorant: & est eis tu-
 tius.

tius per *Iovis* genium pejera-
re, quàm regis. *Cruces* etiam // p. 8. 25.
nec colimus, nec optamus. Vos
planè qui ligneos deos conse-
cratis, cruces ligneas, vt deorũ
vestrorum partes, forsitan ad-
oratis. Nam & signa ipsa, & can-
tabra, & vexilla castrorum,
quid aliud quàm inauratæ cru-
ces sunt, & ornatae? trophæa
vestra victricia non tantum
simplicis crucis faciem, verum
& affixi hominis imitantur.
Signum sanè crucis naturaliter
visimus in navi, cum velis tu-
mentibus vehitur, cum expan-
sis palmulis labitur: & cum eri-
gitur jugũ, crucis signum est: &
cum homo porrectis manibus
Deum purâ mente veneratur:
ita signo crucis aut ratio natu-
ralis innititur, aut vestra religio

E 5 forma

98 *M. Minucij Felicis*

matur. Illum jam velim convenire, qui initiari nos dicit, aut credit de cæde infantis & sanguine. Putas posse fieri, ut tam molle, tam parvulum corpus fata vulnorum capiat? ut quisquam illam rudem sanguinem novelli, & vix dum hominis cædat, fundat, exhauriat? Nemo hoc potest credere, nisi qui possit audere. Vos enim video procreatos filios nunc feris & avibus exponere; nunc ad stragulos misero mortis genere elidere. Sunt quæ in ipsis visceribus, medicaminibus epotis, originem futuri hominis extinguant; & parricidium faciant antequam pariant. Et hæc utique de deorum destrorum disciplinâ discendunt. Nam *Saturnus* filios suos
non

non exposuit, sed voravit. Merito ei in nonnullis *Africa* partibus à parentibus infantes immolabantur; blanditijs & osculo comprimente vagitum, ne flebilis hostia immolaretur. *Tauris* etiam *Ponticis*, & *Aegyptio* *Busiridi* ritus fuit hospites immolare: & *Mercurio* *Gallos* humanas, vel inhumanas victimas cedere. *Romani* *Græcum* & *Græcam*, *Gallum* & *Gallam* sacrificio viventes obruere: hodieque ab ipsis *Latianis* *Iupiter* homicidio colitur: & quod *Saturni* filio dignum est, mali & noxij hominis sanguine saginatur. Ipsum credo docuisse sanguinis fœdere conjurare *Catulinam*: & *Bellonam* servum suum haustu humani cruoris imbuere: & comitiam

100 *M. Minucij Felicis*

initialen morbum hominis san-
 guine, id est, morbo graviore,
 sanare. Non dissimiles & qui de
 arenâ feras devorant illitas, &
 infectas cruore, vel membris
 hominis & viscere faginas.
 Nobis homicidium nec videre
 fas, nec audire: tantumq; ab hu-
 mano sanguine cavemus, vt nec
 edulium, pecorum in cibis san-
 guinem noverimus. Et de ince-
 sto convivio fabulam grandem
 adversum nos dæmonum con-
 cio mentita est: vt gloriam pu-
 dicitiae deformis infamiae aver-
 sione macularet; vt ante explo-
 ratam veritatem homines à no-
 bis terrore infandæ opinionis
 averteret. Sic de isto & tuus
Fronto, non vt affirmator te-
 stimonium fecit; sed conviti-
 um vt orator asperfit. Hæc
 enim

enim potius de vestris gentibus nata sunt. Ius est apud *Per-*
fas misceri cum matribus: *A-*
gyptijs, & *Athenis*, cum sororibus legitima connubia. *Co-*
mœdiæ, & *tragœdiæ* vestræ incestis gloriantur, quas vos libenter & legitis & auditis: & sic deos colitis incestos, cum matre, cum filiâ, cum sorore conjunctos. Meritò igitur incestum penès vos sæpè deprehenditur, semper admittitur: Etiam nescientes miseri potestis in illicita proruere. Dum Venerem promiscuè spargitis, dum passim liberos seritis, dum etiâ domi natos alienæ misericordiæ frequenter exponitis; necesse est in vestros recurrere, in filios inerrare. Sic incesti fabulâ nectitis, etiâ cum conscientiam

non

102 *M. Minucij Felicis*

non habetis. At nos pudorem
 non facie, sed mente præsta-
 mus; vnius matrimonij vincu-
 lo libenter inhæremus. Cupi-
 ditatem procreandi aut vnam
 scimus aut nullam. Convivia
 non tantum pudica colimus,
 sed & sobria. Nec enim in-
 dulgemus epulis, aut convi-
 vium mero ducimus; sed gra-
 vitate hilaritatem tempera-
 mus; casto sermone, corpore
 castiore. Plerique inviolati
 corporis virginitate perpetuâ
 fruuntur potius, quàm glorio-
 antur. Tantum deniq; abest in-
 cessi cupido, vt nonnullis ru-
 bori sit etiâ pudica conjunctio.
 Nec de ultimâ statim plebe
 consistimus, si honores vestros
 & purpuras recusamus: nec
 fastidiosi sumus, si omnes v-
 num

num bonum sapimus, eâdem
congregati quiete qua singuli:
nec in angulis garruli, si au-
dire nos publicè aut erubesci-
tis, aut timetis. Et quòd indiès
nostri numerus augetur, non
est crimen erroris, sed testi-
monium laudis. Nam in pul-
cro genere vivendi & perstat,
& perseverat suus, & accrescit
alienus. Sic nos denique non
notaculo corporis, (vt puta-
tis) sed innocentia ac modestia
signo facilè dignoscimus. Sic
mutuo, quod doletis, amore
diligimus, quoniam odisse non
novimus: si nos, quod invidetis,
Fratres vocamus, vt vnus Dei
parentis omnes, vt consortes
fidei, vt spei cohæredes. Vos
enim nec invicem agnoscitis,
& in mutua odia sævitis: nec
fratres.

104 M. Minucij Felicis

fratres vos, nisi sanè ad parricidium recognoscitis. Putatis autem nos occultare quod colimus, si delubra, & aras non habemus? Quod enim simulacrum Deo fingam, cum si rectè existimes, sit Dei homo ipse simulacrum? Templum quod ei extruam, cum totus hic mundus ejus opere fabricatus, eum capere non possit? Et cum homo laxiùs maneam, intrà vnam ædiculam vim tantæ majestatis includam? Nonnè meliùs in nostrâ dedicandus est mente? in nostro imo consecrandus est pectore? Hostias & victimas Domino offeram, quas in vsum mei protulit? vt reijciam ei suum munus? Ingratum est; cum sit litabilis hostia, bonus animus, & pura mens, & sincera,

vid. pag.
27.

ra conscientia. Igitur qui inno-
centiam colit, Domino suppli-
cat; qui justitiam, Deo libat;
qui fraudibus abstinet, propi-
tiat Deum; qui hominem peri-
culo surripit, optimam victimā
cædit. Hæc nostra sacrificia,
hæc Dei sacra sunt: sic apud
nos religiosior est ille, qui ju-
stior. At enim quem colimus
Deum nec ostendimus, nec vi-
demus. Imò ex hoc Deum cre-
dimus, quòd eum sentire possu-
mus, videre non possumus. In
operibus enim ejus, & in mun-
di omnibus motibus virtutem
ejus semper præsentem adspici-
mus; cum tonat, fulgurat, fulmi-
nat, cum serenat. Nec mireris, si
Deum non videas. Vêto & flati-
bus omnia impelluntur, vibran-
tur, agitâtur; & sub oculis tamen
non

106 *M. Minucij Felicis*

non venit ventus, & flatus. So-
// lem adeò, qui videndi omnibus
// causa est, intueri non possumus.
Radijs acies submovetur; obtu-
tus intuentis hebetatur; & si
diutiùs inspicias, omnis visus
extinguitur. Quî ipsum solis
artificem illum luminis fontem
possis sustinere? cum te ab ejus
fulgoribus avertas, à fulmini-
bus abscondas? Deum oculis
// carnalibus vis videre, cum ip-
// sam animam tuam, quâ vivifi-
caris & loqueris, nec aspicere
possis nec tueri? Sed enim De-
us actum hominis ignorat; &
in cœlo constitutus non potest
aut omnes obire, aut singulos
nosse. Erras ô homo, & falleris.
Vnde enim Deus longè est, cum
omnia cœlestia, terrenaque, &
quæ extra istam orbis provin-
ciam

ciam sunt, Deo cuncta plena
sint? Vbique non tantum nobis
proximus sed infusus est. In
solem adeo rursus intende: cœ-
lo affixus, sed terris omnibus
sparsus est: pariter præsens v-
bique interest, & miscetur om-
nibus. Nusquam enim claritu-
do violatur. Quanto magis De-
us auctor omnium, ac specula-
tor omnium, à quo nullum po-
test esse secretum, tenebris
interest; interest cogitationi-
bus nostris, quasi alteris tene-
bris? Non tantum sub illo agi-
mus, sed cum illo (vt propè di-
xerim) vivimus. Nec nobis
de nostrâ frequentia blandia-
mur: Multi nobis videmur, sed
Deo admodum pauci sumus.
Nos gentes, nationesq; distin-
guimus: Deo vna domus est
mundus.

108 *M. Minucij Felicis*

mundus hic totus. Reges tantum regni sui per officia ministrorum vniversa novêre. Deo indicijs opus non est: non solû in oculis ejus, sed & in sinu vivimus. Sed *Indeis* nihil profuit, quòd vnum & ipsi Deum, aris atque templis maximâ superstitione coluerunt. Ignorantiâ laberis, si priorum aut oblitus, aut inscius, posteriorum recordaris. Nam & ipsi Deum nostrum (idem enim omnium Deus est) quamdiu castè, innoxie, religiosèque coluerunt; quamdiu præceptis salubribus obtemperaverunt; de paucis innumeri facti, de egentibus divites, de servientibus reges; modici multos, inermes armatos, dum fugiunt insequentes, Dei jussu, & elementis

tis adnitentibus obruerunt. Scripta eorum relege, vel si *Romanis* magis gaudes, vt transeamus veteres, *Flavij Iosephi*, vel *Antonij Iuliani*, de *Iudaïs* require: jam scies nequitia sua hanc eos meruisse fortunam: nec quicquam accidisse, quod non sit his, si in contumacia perseverarent, antè prædictum. Ita prius eos deseruisse comprehendens, quàm esse desertos: nec vt impiè loqueris, cum deo suo esse captos; sed à Deo, vt disciplina transfugas, deditos. Cæterum de incendio mundi, aut improvisum ignem cadere, aut difficilem non credere, vulgaris erroris est. Quis enim sapientium dubitat, quis ignorat, omnia quæ orta sunt occidere, quæ facta sunt, interire?

110 *M. Minucij Felicis*

interire? Cœlum quoque cum omnibus quæ cœlo continentur, ita ut cœpisset desinere, fontium dulci aquâ, marisve nutriri, in vim ignis abiturum, *Stoicis* constans opinio est; quod consumpto humore mundus hic omnis ignescat: & *Epicureis* de elementorum conflagratione, & mundi ruinâ eadem ipsa sententia est. Loquitur *Plato* partes orbis nunc invndare; nunc alternis vicibus ardescere: & cum ipsum mundum perpetuum, & insolubilem diceret esse fabricatum; addit tamen ipsi artifici Deo soli & solubilem esse, & mortalem. Ita nihil mirum est, si ista moles ab eo, quo extracta est, destruat. Animadvertis philosophos eadem disputare quæ dicimus

dicimus; non quòd nos simus
eorum vestigia subsecuti, sed
quòd illi de divinis prædicti-
onibus prophetarum, umbram
interpolatæ veritatis imitati
sint. Sic etiam conditionem
renascendi, sapientium clario-
res, *Pythagoras* primus, & præ-
cipuus *Plato*, corruptâ & di-
midiatâ fide tradiderunt. Nam
corporibus dissolutis solas ani-
mas volunt & perpetuò mane-
re, & in alia nova corpora sæ-
pius commeare. Addunt istis
& illa ad detorquendam veri-
tatem, in pecudes, aves, belluas,
hominum animas redire. Non
philosophi sanè studio, sed mi-
mi convicio digna ista senten-
tia est. Sed ad propositum fa-
tis est, etiam in hoc sapientes
vestros in aliquem modum
nobiscum

112 *M. Minucij Felicis*

nobiscum consonare. Cæterum
quis tam stultus, aut brutus est,
vt audeat repugnare, hominem
â Deo, vt primùm potuisse fingi,
ita posse denuò reformari? Ni-
hil esse post obitum, & ante or-
tum nihil fuisse, sicut de nihilo
nasci licuit, ita de nihilo licere
reparâri? Porro difficilius est
id, qd non sit incipere, quàm id
quod fuerit, iterare. Tu perire
Deo credis, si quid oculis no-
stris hebetibus subtrahitur?
Corpus omne siue arefcit in
pulverem, siue in humorem
soluitur, vel in cinerem com-
primitur, vel in nidorem tenu-
atur, subducitur nobis: sed deo
elementorum custodi, reserva-
tur. Nec (vt creditis) vllū dam-
num sepulturæ timemus, sed
& veterem, & meliorem con-
suetudinem

suetudinem humandi frequen-
tamus. Vide adeò quàm in so-
latium nostri resurrectionem
futuram omnis natura medite-
tur. Sol demergit, & nascitur;
astra labuntur, & redeunt; flo-
res occidunt, & reviviscunt;
post senium arbusa fronde-
cunt; semina non nisi corrupta
revirescunt: ita corpus in se-
culo, vt arbores in hyberno, oc-
cultant virorem ariditate men-
titâ. Quid festinas, vt crudâ
adhuc hyeme reviviscat & re-
deat? expectandum nobis eti-
am corporis ver est. Nec igno-
ro plerosque conscientia me-
ritorum nihil se esse post mor-
tem magis optare, quàm cre-
dere: malunt enim extingui
penitus, quàm ad supplicia re-
parari. Quorum error & au-
getur

114 *M. Minucij Felicis*

getur in seculo & libertate remissa, & Dei patientiâ maximâ: / cuius quanto iudicium tardum, tanto magis iustum est. Et tamen admonentur homines doctissimorum libris & carminibus poetarum, illius ignei fluminis, & de *Stygiâ* palude sæpius ambientis ardoris, quæ cruciatibus æternis præparata, & dæmonum inditijs, & de oraculis prophetarum cognita tradiderunt. Et ideo apud eos etiam ipse rex *Iupiter* per torrentes ripas, & atram voraginem jurat religiosè. Destinam enim sibi cum suis cultoribus pœnam præscius perhorrescit; nec tormentis aut modus ullus, aut terminus. Illic sapiens ignis membra vrit, & reficit; carpit, & nutrit. Sicut
ignes

ignes fulminum corpora tangunt, nec absumunt: sicut ignes *Aetna & Vesuvij* & ardentium ubique terrarum flagrant, nec erogantur: ita poenale illud incendium non damnis ardentium pascitur, sed inexesa corporum laceratione nutritur. Eos autem merito torqueri, qui Deum nesciunt, ut impios, ut injustos, nisi prophanus, nemo deliberat; cum parentem omnium, & omnium Dominum non minoris sceleris sit ignorare, quam laedere. Et, quanquam imperitia Dei sufficiat ad poenam, ut noticia prosit ad veniam, tamen si vobiscum Christiani comparemur (quamvis in nonnullis disciplina nostra minor est) multo tamen vobis meliores deprehende-

116 M. Minucij Felicis

hendemur. Vos enim adulteria prohibetis, & facitis; nos vxoribus nostris solummodo viri noscimur. Vos scelera admissa punitis; apud nos & cogitare, peccare est: Vos conscios timetis; nos etiam conscientiam solam, sine qua esse non possumus. Deniq; de vestro numero carcer exæstuat: Christianus ibi nullus, nisi aut reus suæ religionis, aut profugus. Nec de fato quisquam aut solatium captet, aut excuset eventum. Sit fortis fortuna, mens tamen libera est: & ideo actus hominis non dignitas judicatur. Quid enim aliud est fatum, quàm quod de vnoquoque nostrum Deus factus est? qui cum possit præscire materiam, pro meritis & qualitatibus singulorum etiam fa-

ta

vid. August.
de civ. Dei,
l. 5. c. 9. ibi
cap. 1, & 8.

ta determinat. Ita in nobis non
 genitura plectitur, sed ingenij
 natura punitur. Ac de fato satis;
 vel si pauca, pro tempore; dis-
 putaturi aliàs & verius & ple-
 nius. Cæterum quòd plerique
 pauperes dicimur, non est infam-
 ia nostra, sed gloria. Animus
 enim vt luxu solvitur, ita fru-
 galitate firmatur. Et tamen quis
 potest pauper esse, qui non
 eget, qui non inhiat alieno,
 qui Deo dives est? Magis pau-
 per ille est, qui cum multa ha-
 beat, plura desiderat. Dicam
 tandem quemadmodum sentio:
 nemo tam pauper potest esse,
 quàm natus est. Aves sine pa-
 trimonio vivunt, & in diem
 pecua pascuntur: & hæc no-
 bis tamen nata sunt; quæ om-
 nia si non concupiscimus,
 posside-

"Sine. cū
 bonis malis
 accidunt,
 cap. 6.

118 M. Minucij Felicis

possidemus. Igitur ut qui vi-
am terit, co-felicior quò levior
incedit: ita beator in hoc iti-
nere vivendi qui paupertate se
sublevat, non sub divitiarum o-
nere suspirat. Et tamen facul-
tates, si vtilis putaremus, à Deo
posceremus: utique indulgere
posset aliquantum, cujus est to-
tùm: sed nos contemnere ma-
lumus opes, quàm continere.
Innocentiam magis cupimus,
magis patientiam flagitamus:
malumus nos bonos esse, quàm
prodigos. Et quòd corporis
humana vitia sentimus, & pa-
timur, non est pœna; militia
est. Fortitudo enim infirmi-
tatibus roboratur, & calami-
tas sæpiùs disciplina virtutis
est. Vires denique & mentis,
& corporis sine laboris exerci-
tatione.

tatione torpescunt. Omnes ad-
 eò vestri viri fortes, quos in
 exemplum prædicatis, ærum-
 nis suis inclyti floruerunt. Ita-
 que & nobis Deus nec non po-
 test subvenire, nec despicit;
 cum sit & omnium rector & a-
 rnator suorum; sed in adversis
 vnumquemque explorat & exa-
 minat. Ingenium singulorum
 periculis pensitat; vsque ad ex-
 tremam mortem, voluntatē ho-
 minis sciscitatur; nihil sibi pos-
 se perire securus. Itaq; vt aurum
 ignibus, sic nos discriminibus
 arguimur. Quàm pulchrū spe-
 ctaculum Deo, cū Christiāus
 cum dolore concreditur, cū
 adversum minas, & supplicia, &
 tormenta componitur? cū stre-
 pitū mortis, & horrorē carnifi-
 cis irridens insultat? cū liberta-

120 *M. Minucij Felicis*

tem suam adversus reges & principes erigit? soli deo, cuius est, cedit? cum triumphator & victor, ipsi qui adversum se sententiam dixit, insultat? Vicit enim qui quod contendit, obtinuit. Quis non miles sub oculis imperatoris audacius periculum provoeet? Nemo enim præmium percipit ante experimentum: & imperator tamen quod non habet, non dat; non potest propagare vitam; potest honestare militiam. At enim Dei miles nec in dolore deferitur, nec morte finitur. Sic Christianus miser videri potest; non potest inveniri. Vos ipsi calamitosos viros fertis, ad cælum; *Mucium Scaevolam*, qui cum errasset in regem, periisset in hostibus, nisi dextram per-

vid. sense
ubi supra.
cap. 3.

perdidisset. Et quot ex nostris non dextram solum, sed totum corpus vri, cremari, sine vllis ejulatibus pertulerunt; cum dimitti præsertim haberent in suâ potestate? viros cum *Mucio* vel cum *Atilio Regulo* comparo. Pueri & mulierculæ nostræ cruces & tormenta, feras, & omnes suppliciorum terribulas inspiratâ patientiâ doloris illudunt. Nec intelligitis, ô miseri, neminem esse qui aut sine ratione velit pœnam subire, aut tormenta sine Deo possit sustinere. Nisi fortè vos decipit, quòd Deum nesciètes divitijs affluant, honoribus florent, polleant potestatibus. Miseri in hoc altius tolluntur, ut decidant altius. Hi enim ut victimæ ad supplicium laginantur

122 M. Minucij Felicis

nantur; vt hostiæ ad pœnam coronatur. In hoc adeo quidam imperijs ac dominationibus eriguntur, vt ingenium eorum perditæ mentis, licentiæ potestatis liberè nundinentur. Absq; enim notitiâ Dei, quæ potest esse solida felicitas, cum ~~mon~~ sit somnio similis? Antequàm tenetur, elabitur. Rex es: tam times, quàm timeris; & quamlibet sis multo comitatu stipatus, ad periculum tamen solus es. Dives es: sed fortunæ malè creditur, & magno viatico breve vitæ iter non instruitur, sed oneratur. Fascibus & purpuris gloriaris: vanus error hominis, & inanis cultus dignitatis, fulgere purpurâ, mente sordescere. Nobilitate generosus es: parentes tuos laudas: omnes ta-

men

// forte,
max

men pari forte nascimur ; solâ
virtute distinguimur. Nos igitur
qui moribus & pudore cen-
semur , meritò malis volup-
tatibus, & pompis vestris , &
spectaculis abstinemus ; quo-
rum & de sacris originem no-
vimus , & noxia blandimenta
damnamus. Nam in ludis curu-
libus quis non horreat populi
in se rixantis insaniam? in gla-
diatorijs homicidij discipli-
nam? In scenicis etiam non
minor furor ; turpitudine proli-
xior. Nunc enim mimus vel
exponit adulteria , vel mon-
strat. Nunc enervis histrio a-
more dum fingit, infligit. Idem
Deos vestros, induendo stupra,
suspiria, odia, dedecorat. Idem
simulatis doloribus lacrymas
vestras vanis gestibus & nuti-
bus

124 *M. Minucij Felicis*

bus provocat. Sic homicidium
in vero flagitatis; in mendacio
fletis. Quod verò sacrificiorum
reliquias & pocula delibata cō-
temnimus; non confessio timo-
ris est, sed veræ libertatis asser-
tio. Nam etsi omne quod nasci-
tur, vt inviolabile Dei munus
nullo opere corrumpitur; absti-
nemus tamē, ne quis nos existi-
met aut demonijs quibus liba-
tum est, cedere, aut nostræ reli-
gionis pudere. Quis autem il-
le, qui dubitat vernis indulge-
re nos floribus, cum capiamus
& rosam veris, & lilium; &
quicquid aliud in floribus blan-
di coloris, & odoris est? his e-
nim & sparsis vtimur mollibus,
ac solutis, & fertis colla cōple-
ctimur. Sanè quod caput non
coronamus, ignoscite. Auram
boni

boni floris naribus ducere, non occipitio, capillisve solemus haurire. Nec mortuos coronamus. Ego vos in hoc magis miror, quemadmodum tribuatis exanimi, aut non sentienti coronam; cum & beatus non egeat, & miser non gaudeat floribus. At enim nos exequias adornamus eadem tranquillitate, quâ vivimus. Nec adnectimus arescentem coronâ, sed à Deo eternis floribus vividam sustinemus: qui & modesti Dei nostri liberalitate, securi spe futurae felicitatis, fide praesentis ejus majestatis animamur. Sic & beati resurgimus, & futuri contemplatione jam vivimus. Proinde *Socrates* scurra *Atticus* viderit, nihil se scire confessus, testimonio licet fallacissi-

126 M. Minucij Felicis

cissimi dæmonis gloriosus. *Ar-
cesilas* quoque, & *Carneades*, &
Pyrrho, & omnis *Academicorum*
multitudo deliberet: *Si-
monides* etiã in perpetuum con-
perendinet: Philosophorum su-
percilia contemnimus, quos
corruptores, & adulteros no-
vimus, & tyrannos, & semper
adversus sua vitia facundos.
Nos qui non habitu sapientiam,
sed mente præferimus; non e-
loquimur magna, sed *vivimus*.
Gloriamur nos consecutos,
quod illi summâ intétione quæ-
siverunt, nec invenire potue-
runt. Quid ingrati sumus? quid
nobis invidemus, si veritas di-
vinitatis nostri temporis ætate
maturuit? Fruamur bono no-
stro, & recti sententiam tem-
peremus: cohibeatur super-
stitio,

stitio, impietas expietur, vera religio servetur.

Cum *Octavius* perorâsset, aliquādiu nos ad silentium stupefacti, intenti vultus tenebamus. Et quod ad me est, magnitudine admirationis evanui, quòd ea, quæ facilius est sentire, quàm dicere; & argumentis, & exemplis, & lectionū auctoritatibus adornasset: Et quòd malevolos ijsdem illis quibus armantur, Philosophorum telis rerudisset: ostendisset etiam veritatem non tantummodò facilem, sed & favorabilem.

Dum isthæc igitur apud me tacitus revólvo; *Cecilius* sic erupit: Ego *Octavio* meo plurimū, quantum ad tranquillitatem, quā

128 M. Minucij Felicis

quâ vivimus ; sed & mihi gratulor. Nec expecto sententiam ;
 // vicinus, & ita, vt improbus, v-
 // turpo victoriam ; nam vt ille
 // mei victor est , ita ego triumphator erroris. Itaque, quod
 pertinet ad summâ quæstionis,
 & de providentiâ fateor, & de
 Deo cedo , & de sectæ jam nostræ
 sinceritate consentio. Etiam
 nunc tamen aliqua consub-
 sidunt non obstrepentia veritati,
 sed perfectæ institutioni necessaria ;
 de quibus crastino
 (quod jam sol occasui declivis
 est,) vt de toto congruentius,
 promptius requiremus. At ego
 (inquam) prolixius omnium
 nostrum vice gaudeo; quod etiam
Octavius mihi vicerit, cum
 maxima iudicandi mihi invidia
 detracta sit. Nec tamen possum
 me-

meritum ejus verborum laudibus repensare: testimonium & hominis, & vnus infirmum est. Habet Dei munus eximium, à quo & inspiratus oravit, & obtinuit adjutus. Post hæc læti, hilaresque discessimus: Cacilius quòd crediderit, Octavius quòd vicerit; & ego, quòd hic crediderit, & hic vicerit.

* *
*

FINIS.

